

## San Marcos

*Juan chë Ubayaná entšanga yojanabuayiyná  
(Mt 3.1-12; Lc 3.1-9, 15-17; Jn 1.19-28)*

**1** Mëntsá tojanobojatšé chë tšabe noticiënga Bëngbe Bëtsabe Uaquiñá Jesucristbiama.

**2** Ntšamo bayté entsemna, chë Bëngbe Bëtsabe juabna oyebuambnayá Isaías chabe librëšaňe yojëftsayancá, ntšamo Bëngbe Bëtsá chabe Uaquiñábiye ibojauyanama cha tojanábema ora: Minye, atšbe abuayiynayá acbe natsana sëntsichamná,

chë aca jabama lempe echanjapróntha cha.

**3** Entšanga ndoyena luaroca cha enduáyebuache mëntsá:

“Bëngbe Utabná echanjabo ca;  
mo nda canye benache tojtseprontacá canye uámana entšá jashjanguama,  
cachcá tšëngaftanga, cha jabama ainaniňe tšabe juabnëngaca šmochtseprontana ca” —cha tojanábema.

**4** Chcase, Bëngbe Bëtsá Juan tbojanichmó, y cha tojánbocna entšanga ndoyena luaroca, Bëngbe Bëtsabe soyëngama abuayiynaye y entšanga ubáyana. Cha entšanga yojanëtsëtsnaye: “Tšëngaftangbe bacna soyëngama ngménaca šmochtenójuaboye, chca amana šochtsajbaná, y Bëngbe Bëtsabe benache šmochtishache. Chora cbochjúbaye, y Bëngbe Bëtsá tšëngaftangbe bacna soyëngama cmochanjáperdonaye ca.” **5** Nyets Judea luarocana chábioye entšanga imojánbocana, y

Jerusalenentšana nÿetsca entšángnaca, y Bëngbe Bëtsábioye chëngbe bacna soyëngama jaimpáda chentšana, Juan Jordán ca uabaina békayiñe chënga yojanëbáyana.

<sup>6</sup> Juanbe entšayá inauapormana camellbe stjénasheca y bobache yojanasnana; chapulinatémenga y tjañe méloye inasaye. <sup>7</sup> Y mëntsá entšanga yojanëtsëtsnaye: “Atšbe ústonoye inÿa echanjabo, atšbiama más obenana bomná; chíyeca atše merecido taitsatobuajoñe, ni mo jotsejbiyana chabe shecochëtjonëshentša corriëja jajafjonama. <sup>8</sup> Atšna búyesheca cbondëubáyana, pero chë echanjabábeyecna, Bëngbe Bëtsá bochanjíchmua chë Uámana Espíritu tšëngäftangbe ainaniñe cháuamashënguama ca.”

*Juan, Jesúsbioye tbojanabaye  
(Mt 3.13-17; Lc 3.21-22)*

<sup>9</sup> Chë tempo, Galilea luarocana Nazaret pueblentšana Jesús yojëftsebocna, y Juan yojtsemnoye tojána; y Jordán békayiñe Jesúsbioye cha tbojanabaye. <sup>10</sup> Bejayoicana yojtashëbëbocna orna, tojáninÿe celoca atëfniñe, y chë Uámana Espíritu chábioye mo palomatemcá yojtsastjajuana. <sup>11</sup> Y celocana Bëngbe Bëtsá mëntsá tbojaniyana: “Acna atšbe bonshana Uaquiñá condmëna; acbiama corente sëntsoyejuá ca.”

*Jesús tojanabená Satanás jayënjanama  
(Mt 4.1-11; Lc 4.1-13)*

<sup>12</sup> Chentšana chë Uámana Espíritu Jesúsbioye entšanga ndoyena luaroye tbojanánatse. <sup>13</sup> Canta bnëtsana te chë entšanga ndoyena luaroca tbojanjétana, y Satanasna yojanabó

jisháchichiyama. Chë luarentše tšátjaye bayënga imnajena; chentšana, Bëngbe Bëtsabe angelënga cha imojtseservena.

*Jesús tojanontše Galileoca chabe trabajo jamaná*

(Mt 4.12-17; Lc 4.14-15)

<sup>14</sup> Juan cárceloye tmojanétámentšana, Jesús Galileoye tojesaná; y chiñe cha yojanabuayiyná chë tsabe noticiënga Bëngbe Bëtsabiama. <sup>15</sup> Jesús entšanga yojanëtsëtsnaye: “Ora tocjobuache, Bëngbe Bëtsabe amëndayana echanjóshjangó. Tšëngtaftangbe bacna soyëngama ngménaca šmochtenójuaboye, y chca amana šmochtsajbaná y Bëngbe Bëtsabe benache šmochtishache; y ainaniñe chë tsabe noticiënga Bëngbe Bëtsabiama šmochjóyëngacñe ca.”

*Jesús tojánachembo canta boyabásenga beonga ashebuánayënga cha chamuastama*

(Mt 4.18-22; Lc 5.1-11)

<sup>16</sup> Galilea uafjajónaye tsachajana Jesús yojsaye ora, cha tojánanÿe Simón y chabe uabentsá Andrés; chatna atarraiëshangá ibnetsashbuétsetšañe, er beonga ashebuánayata chata ibnamna. <sup>17</sup> Chora Jesús tojanëyana: “Atšeftaca mabata. Atše cbochanjábiama Bëngbe Bëtsabiama entšanga anguayata; y morscana, nÿe beonga ashebuánayata ndoñe quešochátsmëna ca.”

<sup>18</sup> Y cachora chatbe atarraiëshangá cachcá tbojésanaboshjuana y Jesús tmojanasto.

<sup>19</sup> Más chcoye yojátaye orna, Jesús tojánanÿe Santiago y chabe uabentsá Juan, Zebedeoibe uaquiñata; chatna barquëshañe ibnetsotbemañe,

chatbe atarraiëshangá atapórmayiñe. <sup>20</sup> Chora Jesús chë útata tojánachembo; as chatna, chatbe taitá Zebedeo chë barquéshañe tmojésanboshjona chabe peónagaftaca y Jesúseftaca tbojtsanoñe.

*Jesús, bacna bayéjbe juabna cánÿabioye tbojanbo-juaná*  
<sup>(Lc 4.31-37)</sup>

<sup>21</sup> Chentšana, Jesús y chabe uatsjéndayëngä Capernaum ca uabaina puebloca tmojánashjajna. Chë ochnayté, Jesús chë judiëngbe enefjuana yebnentše tojánamashëngö y yojóntsa entšanga jabuátambama. <sup>22</sup> Entšanga imojsenjnanaye ntšamo Jesús yojtsabuatambacá, er chama mo canë mando bomnacá yojtsóyebuambnaye, ndoñe nÿe ntšamo Moisesbe ley abuátambayëngä imojanabuatambacá. <sup>23</sup> Chë pueblentše judiëngbe enefjuana yebnentše yojtsemna canë entšá bacna bayëja uambayá, y chábeyeca chë boyabása yojóntsa mëntsá uayebuáchana: <sup>24</sup> —¿Ndayama bëngbioye tëcjabo, Jesús Nazaretocá? ¿Tcojabo bënga jabétsapochocama? Atše sëndëtatšëmbo nda aca comnama, aca chë Bëngbe Bëtsabe Uamaná ca.

<sup>25</sup> Chora Jesús chë bayéjbioye tbojtsanácacana, y tbojaniyana: —¡lytëca móbema y chábentšana maisebocna ca!

<sup>26</sup> Chora chë bacna bayëjna tojanma chë boyabása ataque chaboshachama, jabuache tojanoyó y chábentšana tojésanbocna. <sup>27</sup> Chama, nÿetsca entšanga ojnanánëngä imojtsemna, y mëntsá imojsentjanaye: “¿Ndayá chca yojtsemna? ¿Canë tsëm buatëmbana soye? ¡Quem boyabása mando bomnacá y obenacá entsabuatambá, y chca, chë

bayëjënga cha jtsamëndayana y chéngnaca joyeu-nayana ca!"

<sup>28</sup> Y betSCO nÿets Galilea luarentša pueblënguenache Jesusbiamá yojtsótatšëmbo.

*Jesús, Simón Pédrëbe uambén mamábioye tbojan-shná*

(Mt 8.14-15; Lc 4.38-39)

<sup>29</sup> Chentšana, chë enefjuana yebnentšana tmojánbocana y Santiago y Juánoftaca Jesús tojána, Simón y Andresbe yebnoye. <sup>30</sup> Simonbe uambén mamá šocá inajájona, jabuache calentóraca, y Jesúsbioye chë šocabiama tmojaniyana.

<sup>31</sup> As chora, Jesús tojanobeconá, chë šocabiye tbojanábuacueshache y tbojanatsbaná. Cachora chë calentora tbojtsanóbojuanañé; y cachora cha tojtantsbaná y tojanontšé chënga jobuácuedana.

*Jesús ba šoquënga tojanashná*

(Mt 8.16-17; Lc 4.40-41)

<sup>32</sup> Chë te jetiñe, shinÿe ya yojuenatjëmba ora, chë luarentša nÿetsca šoquënga y bacna bayëjënga uambayënga Jesúsbioye tmojanënätse; <sup>33</sup> y nÿetsca entšanga bësoye imojobeconá. <sup>34</sup> Jesús banga tojanashná, nÿetsca šocana bomnënga, y ba bacna bayëjënga entšanguentšana tojtanëbuacna; y ndoñe tonjanalesenciá chë bayëjënga chamóyebuambama, er chënga imnatátšëmbo cha chë Cristo bétsemnama.

*Chë judiëngbe enefjuana yebnënguenache Bëngbe Bëtsabe soyëngama Jesúsyojanabuayiyná*

(Lc 4.42-44)

<sup>35</sup> Yëfsana cabá cachëse, cabá ibetcá, Jesús tojëftsantsbaná, chë pueblentšana tojëftsanbocna

y entšanga ndoyena luaroye tojtsanoñe, choca Bëngbe Bëtsáftaca jencuéntama. <sup>36</sup> Pero Simón y chabe enuténgna tmojána jetsenguanguama; <sup>37</sup> y tmojtsaninýena ora tmojaniyana: —Nÿetscanga cmontsenguá ca.

<sup>38</sup> Y Jesúz tojanéyana: —Inýoye cuajna, cam béconana puebléngoye, chíñnaca Bëngbe Bëtsabe soyéngama entšanga chayábuayenama; er chama atše sénjabo ca.

<sup>39</sup> Y chentšana, Jesúz yojánana Bëngbe Bëtsabiamá entšanga abuayiynaye chë judiéngbe enefjuana yebnënguenache, nÿets Galileiñe, y entšángbentšana bacna bayëjënga yojtëbuacana.

*Jesúz, canýa bacna nguayanánaca šocábioye tbojanshná*

(Mt 8.1-4; Lc 5.12-16)

<sup>40</sup> Chentšana, canýe boyabásá bacna nguayanánaca šocá Jesúsbioye tojanobeconá; y joshaméntšase mëntsá tbojanimpadá: —Aca tcojtseboëse, aca catjobenaye atšbe šocana jtsebojuánama ca.

<sup>41</sup> Jesúz chabiama tbojanongmé; cucuátseca tbojánbojajo y tbojaniyana: —Aíñe sëntseboëse. ¡Šocana cbotsebojuaná ca!

<sup>42</sup> Y cachora chë šocana tbojtsanóbojuanañe y tšabá yojtsatsmëna. <sup>43</sup> Chora Jesúz chábioye tbojtanichmó, pero puerte mëntsá tbojanmandá:

<sup>44</sup> —Mouena; ndocnábeñe quem soye cattsecuéntaye; nÿe Jerusalenoca báchnëbioye motsa y cha cochjinýinýye aca mora ya tšabá cojtsatsmënamá. Chora cochjuátsëembona ntšamo Moisés chabe leyiñe tojanmandacá, Bëngbe

Bëtsábioye chama jëtschuayama, chca, nÿetsca entšanga chamotatšëmbona mora ya tšabá cojtsatsménama ca.

**45** Pero chë boyabásana, chentšana tojéftsanbocna y cachora yojóntsa nÿetsquénache entšanga yapa acúntayana Jesús tbojanshnama. Chë causa, Jesús ndoñe yontsobena entšangbe delante pueblënguenache jtsanana, ndayá nÿe chë pueblënga bëconana y nÿetsca chë entšanga ndoyena luarënguiñe yojánana; pero nÿets luarëngocana chábioye entšanga imojánashjajuana.

## 2

*Jesús, canÿe jama ndobenábioye tbojanshná  
(Mt 9.1-8; Lc 5.17-26)*

**1** Chentšana, Jesús Capernaumoye tojtanashjango; y entšanga imojátatšëmbona, Jesús yebnentše yojtsatsménama. **2** Mallajta entšanga chentše tmojanójoto; chë causa chë yebnentše ya tondaye más luare entšangbiama yontsemna, ni mo chë amashjuanentše, y Jesús Bëngbe Bëtsabe soyëngama yojtsabuayiynaye. **3** Chora tojanopasá, canta boyabásenga tmojánashjango, canÿe entšá jama ndobená imojtsaismana. **4** Pero ndoñe tmonjanobená Jesús yojtsemnoye cha juambana, tsa entšanga causa. Chcasna, chë canta boyabásenga yebna tsbanánoca, Jesusbe tatsëtsoca batšá tmojánatëfjo y chëjana chë jama ndobená tjuashiñe tmojanéstjango. **5** Jesús tojáninÿe chënga tsa imojtsošbuaché chë šocá jáshnama cha yojanobenama; as chë jama ndobenábioye

tbojaniyana: “Sobreno, mouena; acbe bacna soyënga tcbontseboperdoná ca.”

<sup>6</sup> Chentše báseftanga judiëngbe ley abuátambayëngä imnatbemana; chënga chora mëntsá imojtsejuabnaye: <sup>7</sup> “¿Ntšámoyeca quem boyabása chca yojtsichamo? Jesú斯 ndoñe tšabá Bëngbe Bëtsabiamä quenátichamo; mo chábioye cuafjoyenguangcá entsemna. Ndocna entṣá quenátobena ínyabioye bacna soyëngama japerdónana; nÿe Bëngbe Bëtsana aíñe ca.”

<sup>8</sup> Pero Jesú斯 cachora lempe yojtsetatsëmbo ntšamo chënga ainanoca imojtsejuabnacá; as tojanéyana: “¿Ndáyeca chca tšëngtaftanga ainaniñe šmojtsejuabná? <sup>9</sup> ¿Tšëngtaftangbiama ndayá más paselo nántsemna tšëngtaftangbe delante chë jama ndobenábioye atše jauyanana: ‘Acbe bacna soyënga tcbontseboperdoná’, o ‘Matëtsbaná, acbe tjuashe mesocñe y motsa ca’? <sup>10</sup> Y chca, mora atše cbochanjínÿanÿiye Bëngbe Bëtsá Entšá tbojanbemá quem luariñe obenana yobomnama, entṣanga bacna soyëngama jáperdonama ca”—Jesú斯 tojánayana.

Y chë jama ndobenábioye tbojaniyana: <sup>11</sup> “Atše cbeyana, matëtsbaná, acbe tjuashe mesocñe y acbe yebnoye motsatoñe ca.”

<sup>12</sup> Cachora chë jama ndobená tojtantsbaná, chabe tjuashe yojesocñe, y entṣangbiajana chentšana yojésebocna. Chama nÿetsca entṣanga imojenjnaná y Bëngbe Bëtsábioye imojtsatschuanaye, y mëntsá imojtsichamo: “Nÿa ndocna te tsa bëts soye chemuáisinÿe ca.”

*Jesús, Levíbjoye tbojanchembo chabuastama  
(Mt 9.9-13; Lc 5.27-32)*

<sup>13</sup> Chentšana, Jesús cacheñiñe chë uafjajónaye tsachoye tojesaná; ba entšanga chábioye imojobecóná, y Jesús yojsabuátambaye. <sup>14</sup> Chentšana yojsataye orna, Jesús tbojáninÿe Levíbjoye, Alfeobe uaquiñá, yojsanotbemañe, entšanga impuesto atjanayacá inétsotrabajañe. Chora Jesús tbojaniyana: “Smasto ca.”

Y Leví tojantsbaná y tbojanasto.

<sup>15</sup> Tojanopasá, Jesús Levibe yebnentše yojsesaye, y banga Romocama entšanga impuesto atjanayënga y inÿe bacna entšanga, meséshentše cánÿiñe imojtsetbiámana, Jesús y chabe uatsjéndayëngtaftaca; er ba entšanga cha imojústona. <sup>16</sup> Chë fariseunga y chë ley abuátambayënga, chë entšángtaftaca Jesús yojsesama tmojáninÿe ora, chabe uatsjéndayëngbioye tmojanatjá: —Ndáyeca tséngtaftangbe buatëmbayá, entšanga impuesto atjanayëngtaftaca y bacna soye amëngtaftaca yojsesá ca?

<sup>17</sup> Jesús chca tojanuena; as mëntsá tojanëjua: —Chë salud tmotsobomñënga, ashnayá ndoñe ntséjabótana, pero chë šoquëngna aíñe. Y atše ndoñe chiyátabo chë Bëngbe Bëtsabe bominÿiñe tšabá amëngä jabáchembuama, ndayá chë bacna soye amëngä imomna ca juabnayënga átsbiyoje jabáchembuama ca.

*Jesús tmojantjá chë Bëngbe Bëtsáftaca jencuéntama  
tondaye saytescama  
(Mt 9.14-17; Lc 5.33-39)*

**18** Canëe, Juan chë Ubayanabe ústonënga y chë fariseungbe usetonënga, Bëngbe Bëtsáftaca jencuéntama tondaye ntjascá imojtsemna ora, básefta entšanga Jesùsbiye tmojanobeconá y mëntsá tmojaniyana: —Juanbe ústonënga y chë fariseungbe usetonënga monduamana tondaye ntjascá jtsemnana Bëngbe Bëtsáftaca jencuéntama. ¿Ndáyeca acbe uatsjéndayënga ndoñe chca ca?

**19** As Jesùs tojanéjua: —Chë casamento fiestentše, chë ófjanënga saná ndoñe ntsabuáshebenana. ¿Ntšamo chca ndoñe nántsemna? Chë tojobouamá entšá chéngtaftaca tojtsemnëntscuana, chë ófjanënga bëtscá jasana y cháftaca oyejuayënga jtsemnana. **20** Pero ora echanjobuache y chë boyabása chéngbentšana mochantsánatseñé; chora cocayé chë ófjanënga echántsamna tondaye ntjascá jtsemnana. Ntšamo chë tojobouamá boyabása y chë ofjanéngtaftaca endmëncá, cachcá endmëna atše y atšbe uatsjéndayëngtaftacnaca.

**21** “Ndocná, canëe tanguá entšayá, base tsém entšéjuaca jtarméndana; chca tcojamëse, chë tsém entšéjuaca jtsabéconana y chë tanguá entšayá más jtsatanécanana, y chca, chë uátanéciñé más bëtsiñé jtsabemana. **22** Y cach ndoñe, chë tojtseshayana vínoye tanguá jasabenguiñé ntjataftsuámayana; er chë jasabenga jtseshébëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsém jasabenguiñé juafitsuámmana; chca, chë jasabenga y chë vínoye

josérviana ca” —Jesús tojánayana.

*Jesusbe uatsjéndayënga canëe ochnaytë trigo tmojanátabebe*

*(Mt 12.1-8; Lc 6.1-5)*

**23** Canëe ochnaytë, Jesús canëe jajajana yojsaye; y chabe uatsjéndayënga chëjana imojsachnëjuana ora, tmojanontsé trigo juatabebiana. **24** Chë fariseunga chca imojinëe ora, Jesúsbiye tmojaniyana: —Minëe. ¿Ntšamo acbe uatsjéndayënga montsamcá, ndoñe quenátslesenciana ochnaytë jt-samama ca?

**25** Pero cha tojanëua: —¿Ndoñe šmëndualía y šmondëtatšëmbo ntšamo Rey David y chabe enutënga tmojanmama shëntseca imojtsemna ora y jasama yojsëjaboto ora? **26** Chca ora, Abiatar chë judiëngbe bachnangbe más uámana amëndayá inamna ora, David Bëngbe Bëtsabe yebnoye yojámashëngo, y chë luarentše Bëngbe Bëtsá yojamnama inyinënyaye tandësënga yojase; y chë chäftaca imojánajna entšángnaca yojátšataye. Y chë tandësna nÿe bachnangbiama belesenciana jasama. Masque David chca tojanma, Bëngbe Bëtsá ndoñe tonjánayana David canëe bacna soye tojanma ca.

**27** Y Jesús más tojánayana: —Bëngbe Bëtsá ochnaytë entšabiamma tojama y entšá ndoñe tbonjánbema nÿe chë ochnaytë ndoñe chaondëtrabajama. **28** Chíyeca, Bëngbe Bëtsá Entšá tbojanbemá, ndayá entšá ochnaytë tojtsama sóynaca jtsemándayana ca.

**3***Chë buashana cucuatše bomna entsá  
(Mt 12.9-14; Lc 6.6-11)*

<sup>1</sup> Chentšana, Jesús cache chë judiëngbe enefjuana yebnoye tojésanamashëngo; y chentše canýe boyabása yojtsemna, buashana cucuatše bomná.

<sup>2</sup> Chë fariseunga chiñe imojserrondana jinýama nderado Jesús chë ochnayté chábioye tabuanjashnama, as chca chënga jtsebomnama ndaye sóyeca cha mal jaquédana. <sup>3</sup> Chora Jesús chë buashana cucuatše bomnábioye tbojaniyana: —Chentše, entsangbe delante motsa ca.

<sup>4</sup> Y chë fariseunga tojanatjá: —¿Ndayá yojtselesenciana ochnayté jamama, tšabe soye o ndoñe tšabe soye? ¿Jatsbocama o jtseepochócama ca?

Pero chënga ndocá tmonjanjuá, nýe iytéca imojobiama. <sup>5</sup> Chora Jesús rábiaca y ngménaca chë fariseunga tojanënyanýé, chënga ainaniñe josértama ndoñe montseboše causa; y chë buashana cucuatše bomnábioye tbojaniyana: —Macuenýanéjaná ca.

As chë boyabása tojanacuenýanéjaná, y chora tšabá chëtsa yojtsatamna cach inyetšacá. <sup>6</sup> Pero chë fariseungna, chentšana tmojésanbocana ora, Rey Heródesbe ustonëngtaftaca tmojanenoyeuná Jesusbe contra, y tmojanontsé juabnayana ntšamo jamëse Jesús jóbama.

*Mallajta entsanga Jesúsbioye tmojanobeconá*

<sup>7</sup> Chentšana, Jesús chabe uatsjéndayëngtaftaca tojanoluaré mar békaye tsachoye, y Galileocana bëtscá entsanga tmojanasto. <sup>8</sup> Inýe entsángnaca chábioye tmojanobeconá Judeocana,

Jerusalenocana, Idumea ca uabaina luarocana, Jordán békaye chenguanoicana, Tiro y Sidón puebléngocana. Chéngá tmojanobeconá, Jesús t̄sa bëts soyënga yojsamama tmojanuena ora.<sup>9</sup> Jesús chabe uatsjéndayëngä tojanéyana: “Motsajna y canëye barquësha atšbiamá šmochjuapróna, t̄sa entšanga ndoñe chašmondétsatséntšnama ca.”<sup>10</sup> Er cha banga tojanashná, y ché causa, nÿetscanga šocana bomnëngä chábioye tmojanouatséntšená cha jabojajuama.

<sup>11</sup> Y ché bacna bayëjëngä uambayëngna, Jesús tmojinëye ora, betscó chabe shecuatšentše imojtsofshéntsaméntšenaye, y ché bacna bayëjëngbeyeca mëntsá imojtsáyebuache: “¡Aca Bëngbe Bëtsabe Uaquiñá condmëna ca!”

<sup>12</sup> Pero Jesús puerte tojanamëndá, nda cha bétsemnama entšangbe delante ndoñe chamondétsichámuama.

*Jesús ché bnëtsana uta uatsjéndayëngä tojanabacacá*

*(Mt 10.1-4; Lc 6.12-16)*

<sup>13</sup> Chentšana, Jesús canëye batsjoye tojántsjua, y ndëmuanëngä tšabá tbojanínënanëngä tojánachembo. Y chéngna chábioye tmojanobeconá.

<sup>14</sup> Chora, chénguentšana bnëtsana útata tojanëbuáyana, chamotsetjëmbambnama, y Bëngbe Bëtsabe soyëngama entšanga chámabuayenama;

<sup>15</sup> y chéngna obenana tojanatšatá entšángbentšana bacna bayëjëngä jtëbuacanama. <sup>16</sup> Mënga

mondmëna ché bnëtsana uta bocacánëngä: Simón, ché ndábioye Pedro ca Jesús tbojanabaye;

<sup>17</sup> Santiago y chabe uabentsá Juan, Zebedeoibe

uaquiñata, chata tojanëbaye “boanerges ca”, y chca endayana “uajuesayabe uaquiñata ca”; <sup>18</sup> Andrés, Felipe, Bartolomé, Mateo, Tomás, Santiago, Alfeobe uaquiñá; Tadeo, Simón chë celote ca uabobainá; <sup>19</sup> y Judas Iscariote, chë chentšana ndoñe baytesna, Jesús uayayëngbe cucuatšiñe bochjanboshjoná.

*Ley abuátambayëngä tmojánayana, Jesús Satanásbentšana obenana tojanóyëngacñe ca  
(Mt 12.22-32; Lc 11.14-23; 12.10)*

<sup>20</sup> Chentšana, Jesús yebnoye tojtanamáshëngó, y tsa entsanga chentše tmojanójoto; chë causa, ni cha ni chabe uatsjéndayëngä, ni mo jasama luaré ndoñe imontsebomna. <sup>21</sup> Jesusbe pamíllanga ntšamo cha yojtsepásama tmojántatšëmbona ora, tmojána cha jetsbetšama, er entsanga imojtsencuéntaye cha opá tojtsanóbema ca.

<sup>22</sup> Y chë ley abuátambayëngä Jerusalenocana tmojánashajjnëngna Jesusbiama mëntsá imojtsichamo: “Chabe ndegombre mandayá Beelzebú, cach Satanás yojtsemna. Cha, chë bacna bayëjëngä amëndayá, Jesúsbiye obenana tbojatsetá entsángbentšana bacna bayëjëngä chauatëbuacnama ca.”

<sup>23</sup> Chënga chca imojtsichámuama, Jesús chënga tojánachembo, y cuentëngaca tojanontsé jáuyanana, jinýyanýiyama chënga canëye ndoñe ndegombre soyiñe imojtsemnama, mëntsá: “¿Ntšamo Satanás nantsobena cachá jtenábocnama ca? <sup>24</sup> Canëye amëndayábentše entsanga tmojtsenojatá y tmojtsenáyase, chë amëndayana ndoñe ntjatotonana. <sup>25</sup> Cachcá, canëye yebnentše

pamíllanga tmojtsenojatá y tmojtsenáyase, chë pamíllanga ndoñe tšabá nÿets tempo quemochátsmëna. <sup>26</sup> Y cachcá, Satanás y chábenga ndoñe tmontsenëyeunana y cachabe contra tojtsemnëse, chabe améndayana ndoñe más queochátstotona; y cha ya ndoñe más chëngbe améndayá queochátsmëna.

<sup>27</sup> “Ndocná quenátobena canÿe corente añemo bomna entšabe yebnoye jamashënguana y chabe soyënga jtsebocana, ndoñe natsana tconjshétsebatsëquëse. Nÿe tcojshétsebatsëquëse cocayé cuanjobenaye cha jefcana.

<sup>28</sup> “Ndegombre cbéyana, Bëngbe Bëtsá entšangbe nÿetsca bacna soyënga echanjáperdonaye, y ntšamo Bëngbe Bëtsabiamá y ínÿengbiama ndoñe tšabá tmontsichamo soyëgnaca; <sup>29</sup> pero chë Uámana Espíritbiama ndoñe tšabá ichámëngna ndocna te queochátaperdonaye, er nÿetsca tescama castigánënga jtsemnama chëngä jtsamnana ca” —Jesús tojánayana.

<sup>30</sup> Jesús chca tojanéyana, er chëngä imojtsichamo cha bacna bayëja ibojtsambá ca.

*Chë Jesusbe ndegombre pamíllanguentšëngä  
(Mt 12.46-50; Lc 8.19-21)*

<sup>31</sup> Chëntscuana, Jesusbe mamá y catšátanga choye tmojánashjajna, pero nÿe shjoca imojtsemna; y canÿa tmojanichmó cha jachembuama. <sup>32</sup> Chë ba entšanga chentše chabe shéconana imojtsetbiámanëngna, chora tmojaniyana: —Acbe mamá, acbe catšátanga y uabénanga shjoca montsemna; aca cmontsenguá ca.

**33** Chora cha tojanéjua: —¿Nda atšbe mamá yomna, y ndëmuanýenga atšbe catšátanga ca?

**34** Chentšana, chë chabe shëconanana tbiamanëngbiye jarrepárase, tojánayana: — Quemënga mondymëna atšbe mamá y atšbe catšátanga. **35** Er ndánaca, ntšamo Bëngbe Bëtsá yobošcá tojtsamá, jtsemnana atšbe catšata, atšbe uabena y atšbe mamá, atšbe ndegombre pamillanguentsá ca.

## 4

### *Chë jenabe cuento (Mt 13.1-9; Lc 8.4-8)*

**1** Chentšana, uafjajónaye tsachoca Jesús tojtétanontsé Bëngbe Bëtsabe soyëngama jabuátambama. Mallajta entšanga tmojanobeconá causa, chë uafjajónayentse yojanamna canëye barquëshoye Jesús tojánašëngo y tojanótbema; y chë entšanga tsachoca imojtsemna. **2** Chora cuentëngaca ba soyëngama tojanabuatambá.

Mëntsá tojanéyana: **3** “Smochjouena; canëye jená chë jénaye jaujquëshama yojéftsebocna.

**4** Yojtséjquëshaye orna, básefta jénaye benache juachañe yojuatquëcjana; pero jaja shloftëngä imojástajna y lempe imojsósañe. **5** Inëye meshëngna ndëtësbenguiñe yojuatquëcjana, ndoñe yapa fshantse binÿnentse. Chiñna betsco yojuábocna, ndoñe yapa jashenocana fshantse yojanmëna causa; **6** pero yojuábocna orna, puerte yojojënýána y yojtsancta; y yojtsábojo yapa tbëtëjëngä tondaye causa. **7** Inëye meshëngna uchmëshangañe yojuatquëcjana; chë uchmashá yojuájua ora,

lempe yojsatscué, y chca, chë jénayentšana tondaye yonjuashájona. <sup>8</sup> Pero inÿe meshëngna, uanguaniňe yojuatquécjana, y bëtscá tšabe shajuanënga chiñe yojóbocna: ínÿenache, canÿe meshentšana unga bnëtsana meshëngä yojóbocna; ínÿenachna, chnënguana bnëtsana meshëngä; y ínÿenachna patse meshëngä ca” —cha tojánayana.

<sup>9</sup> Y chentšana, Jesús más tojánayana: “Chë jue-nama tmojtobenënga, šmochjouena ca.”

*Ndáyeca Jesús cuentëngaca yojánabuataambaye  
(Mt 13.10-17; Lc 8.9-10)*

<sup>10</sup> Chentšana, Jesús canÿa yojóquéda ora, chë chabe béconana imojtsemnënga chabe bnëtsana uta uatsjéndayëngäftaca, tmojantjá ndayá chë cuento bëtsayanama. <sup>11</sup> As Jesús tojanëjua: “Bëngbe Bëtsá tšëngäftanga cmontsinÿanÿná nÿetsca chë mo iytémencá yomna soyëngä chabe amëndayama, pero chë ínÿengbiye ndoñe; chë soyëngama chëngä lempe cuentëngaca sëntsëtsëtsná. <sup>12</sup> Chca, masque becá chamotsafšna, ndoñe chamondobená chë Bëngbe Bëtsabe soyëngä jinÿama; y masque becá chë soyëngä chamouena, ndoñe queochátësertana, chëngä Bëngbe Bëtsábiye ndoñe chamondëtobéconama, y cha ndoñe chaondáperdonama ca.”

*Jesús chëjenabe cuentama tojanabuayená  
(Mt 13.18-23; Lc 8.11-15)*

<sup>13</sup> Chentšana, Jesús tojanëyana: “¿Quem cuentama ndoñe tcmonjósertase, ntšamo chcuse nÿetsca cuentëngama cmochjóserta ca? <sup>14</sup> Chë jená endmëna chë tšabe noticiëngama abuayiynayá. <sup>15</sup> Básefta entšanga mondëmëna

mo chë benache juachañe yojuatquécjana jenaycá. Chëngna Bëngbe Bëtsabiamá soyënga jouenana; pero chora Satanás betsco jabana, chëngbe ainaniñe yojtsemna Bëngbe Bëtsabe palabra jabétsabuajuanama, chëngá chiñe ndoñe chamondëtsosbuáchema. <sup>16</sup> Inÿe entsanga mondémäna mo chë ndëtsbenguiñe yojuatquécjana jenaycá; chëngna Bëngbe Bëtsabe palabra jouenana y oyejuayëngá jtsemnana; <sup>17</sup> pero ndoñe nÿets tempo chana jocochájuana; y chca, ndoñe bayté Bëngbe Bëtsáftaca ntjëftsemnëngana, ndoñe yapa tmontsašbuaché causa. Inÿenga mochantsébuayëngá, y Bëngbe Bëtsábeñé betsošbuáchiyama mochanjasúfrianga; chíyeca chëngá Bëngbe Bëtsabe palabra cachcá mochanjesonÿaye. <sup>18</sup> Inÿenga mondémäna mo chë uchmëshangañe yojuatquécjana jenaycá. Chëngá Bëngbe Bëtsabe palabra mochanjouena, <sup>19</sup> pero quem luarentša soyëngaca oyejuayëngá jtsemnama yapa mochántseboše, y nÿe bomnana jëftsebomnama yapa mochanjésenojuabnaye. Chë soyama y inÿe ba soyëngama yapa enócochinÿena causa, Bëngbe Bëtsabe soyëngama echantsebnétjomba, y ndoñe quemochátama ntšamo Bëngbe Bëtsá tojayancá. <sup>20</sup> Pero inÿenga mondémäna mo chë uanguaniñe yojuatquécjana jenaycá. Chëngna Bëngbe Bëtsabe palabra botamana mochanjouena; nÿets ainánaca mochántseprontana chiñe jtsošbuáchiyama. Mo canÿe betiye becá tšabá tojtseshajuançá, chëngá bëtscá tšabe soyëngá Bëngbe Bëtsabiamá mochántsama. Inÿenga inÿengbiama más

bëtscá soyënga mochanjama; y chca, ínÿenga mochántsemna mo chë unga bnëtsana meshe tojanshajo jenaycá, ínÿenga mo chë chnënguana bnëtsancá, y ínÿengna mo chë patse meshënga tojanboté jenaycá ca” —Jesús tojánayana.

*Chë uajuinÿanëshama cuento  
(Lc 8.16-18)*

**21** Mëntsánaca Jesús tojánayana: “Ndocná juiyëbana canye uajuinÿanësha cajonëshe o jut-snësha tajsoye juajájuama. Ndoñe; uajuinÿanësha juiyëbana tsbanánoca juajájuama, lempe chaotsebínÿnama. **22** Ndocna yoitëmena soye ntjinÿencá queochaisoquéda, y chë ndótatšëmbo soye ntsotatšëmbcá queochaisoquéda. **23** Chë jouenama tmojtsobenënga, šmochjouena ca.”

**24** Y mëntsánaca Jesús tojanëyana: “Tšabá šmochjájuaboye ntšamo šmojtsuenanama. Nyé batšatema šmojouenëse, nyé batšatema cmochanjósertaye; pero aíñe tšabá šmojouenëse, chama corente cmochanjósertaye; y Bëngbe Bëtsá echanjama tšëngافتanga más soyëngama chacmósertama. **25** Er nda Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama josértama ndoñe tontsebošá, chë nyé batšá ibosertana soyëngama bochántsebnatjëmba ca” —cha tojánayana.

*Chë ojuajna jenayama cuento*

**26** Jesús mëntsánaca tojanëyana: “Bëngbe Bëtsabe amëndayana endmëna mo ntšamo canye boy-abása jénaye tojuatbontsá ora echandbopasacá:

**27** masque cha cada ibeta jtsojájuana y bnëté jotsbanama, ibeta o bnëté, chë jénayentšana juabocnana y juájuana, ntšamo chca yojtsájuajnama chë boyabásá ntjatstatšëmbcá. **28** Chë fshantse cachabe ponto jamana ndayánaca chiñe chaójuama; natsana tsbuuanachëtema jóbocnana, chentšana chë espiña, y chentšana chë meshënga jashájonana. **29** Y chë meshënga ya tojtsebóchichna orna, játbanama jabocnana, chë saná josháchiñama ora ya tojobuácheyeca ca” —Jesús tojánayana.

*Chë mostaztiye jenayama cuento  
(Mt 13.31-32; Lc 13.18-19)*

**30** Jesús mëntsánaca tojanéyana: “¿Ndayacá Bëngbe Bëtsabe améndayana yomna, o ndaye sóyeca nanjopódia chama jábuuyenama? **31** Endmëna mo canëe mostaza jénaye jajoca tcoajecá. Ndegombre, nÿetsca quem luarentša jenayëngama, mostaza jénaye chë más básetema endmëna; **32** pero tcoajé orna, jójuana, y jajañe chë más bëts betiye jóbemana, ba bëts buacuashëngaca; chíyeca chë jaja shloftšëngä jana y chiñe uajajonëtemëngá jauábopormana ca.”

*Ndáyeca Jesús cuentëngaca entšanga  
yojanabuayiyná  
(Mt 13.34-35)*

**33** Chca Jesús Bëngbe Bëtsabe soyëngama entšanga yojanabuatambá, ba cuentënguentšana, mo chë tmonjouena cuentcá, ntsachetšá chë entšanga josértama tmojobenacá. **34** Tondaye yonjanabuatambá ndoñe cuentëngaca ntsemëncá; pero chabe uatsjéndayëngna lempe yojanabuayiyná, cánÿenga tmojtsemna ora.

*Jesús chë binÿia y chë békaye bonguana  
yojétsbema  
(Mt 8.23-27; Lc 8.22-25)*

**35** Cach te, yojtseibétatana ora, Jesús chabe uatsjéndayëngä tojanëyana: “Uafjajónaye chenguana cuajna ca.”

**36** Chorna, chë entšanga jesabáshejuanëse, chë uatsjéndayëngä Jesús tmojtsanánatseñë, cach yojánenjaquena barquéshañë; y inyé entšángnaca inyé barquéshangañë tmojanasto.

**37** Chentšana, chë uafjajónaye békayiñë tša jabuache binÿia yojóshjango; olëshënga chë barquésha imojsétsbotsana, y chë causa chë barquésha yojóntša búyesheca jtsobuajútjiana.

**38** Y chéntscura, barquésha stëtšoica, tséntsenéshañë Jesús yojtsomañë. Chora chë uatsjéndayëngä tmojtsanfšená y tmojaniyana: — ¡Buatëmbayá! ¿Tondayana cmontsentšamna bënga chašotsénatjëmbama ca?

**39** As Jesús tojantsbaná, chë binÿia tbojanácacana, y chë bëts uafjajónayoye tojánayana: — ¡Natjëmbana cochtsemna! ¡Bonguana ca!

Y cachora chë binÿia yojëstëcja, y lempe bonguana yojtsatsmëna. **40** Chora chabe uatsjéndayëngä tojanëyana: — ¿Ndáyeca tša šmojtsauatja? ¿Bëngbe Bëtsá tšëngtaftanga jujabuáchama yobenama cabá ndoñë šmontsošbuaché ca?

**41** Chama, chënga puerte auatjanánëngä imojssemna y mëntsá imojtseñatsëtsnaye: “¿Nda quem boyabása yomna? Cha tonjayana y chë binÿia y chë békaye tmonjoyeuná ca.”

## 5

*Chë Gerasa luaroca bacna bayëja uambayá  
(Mt 8.28-34; Lc 8.26-39)*

<sup>1</sup> Chentšana, uafjajónaye chenguánoica tmojánashjajna, Geraseno ca uabaina entšangbe luaroye. <sup>2</sup> Jesús barquëshoicana tojánastjangó, y cachora, chë obanëngbe cuevëshënguentšana canëe entšá, bacna bayëjbe juabna uambayá, tojánbocna y tbojanjébengo. <sup>3</sup> Chë boyabásana, obanëngbe cuevëshënguenache inoyena, y ndocná yonjobena cha jtsebátsëcana, ni mo cadenéjuangaca; <sup>4</sup> er ba soye cadenéjuangaca y inëe soyëngaca cha nÿetsá tmojanbatsëca, pero cha nÿetsca soye yojtsátabebe y yojtsenájaca, y ndocná yonjobenaye cha bonguana chaotsemnama. <sup>5</sup> Nÿets tempo, bnëté y ibeta, obanëngbe cuevëshënguenache y tjañenache yojánana yoye, y ndëtsbéngaca enotsetšenaye. <sup>6</sup> Jesúsbiye bënocana tbojáninëe ora, chábioye tojanótjajo y chabe natsanoica yojoshëntsamentsiye; <sup>7</sup> y mëntsá yojtsáyebuache: —¿Ndayá átšeftaca cojtseboše, Jesús, celoca Bëngbe Bëtsabe Uaquiñá? ¡Bëngbe Bëtsabe delante choimpadá, ndoñe šcatjatsetšená ca!

<sup>8</sup> Chca tbojaniyana, er Jesús chábioye tbojaniyana: —¡Bacna bayëjbe juabna, chábentšana maisebocna ca!

<sup>9</sup> Chentšana Jesús tbojantjá: —¿Ntšamo cabaina ca?

Y chë bacna bayëjengbe juábnaca cha tbojanjuá: —Atšna Legión ca sënduabaina, bëtscanga fsëndmëna causa ca.

**10** Y t̄sa Jesúś ibojtserruana ch̄e luarentšana ndoñe chaondétēbuacanama. **11** Chent̄sa béconana ba cotšenga imnajena, batsjoca imnētsosañe; **12** as ch̄e bacna bayējēngā Jesúśbioye tmojanimpadá: — Ch̄e cotšēngbioye šmichamó, chēngbeñe fchayamashjna ca.

**13** Y Jesúś aíñe tojanalesenciá; as ch̄e bacna bayējēngā ch̄e entšábentšana tmojésanbocana y ch̄e cotšēngbeñe tmojánamashjna. Cachora ch̄e mo uta uaranga cotšenga batsjocana peñëšejana uafjajónayoye imojsoshbuetše y yojtsatajo.

**14** Chora, ch̄e cotšenga anýenēngā tmojtsanacheta auatjanánēngā, y tmojána chama jacuéntama ch̄e puebloa y chabuenache; y entšanga tmojánabo ntšamo tojanopasacá jinýama. **15** Jesúś yojtsemnoye ch̄e entšanga tmojánashjajna ora, tmojáninŷe ch̄e tempo bacna bayējēngā uambayá, inétsotbemañe, entšayá uichëtjoná y chabe nýets juábnaca. Y ch̄e entšanga chama imojséuatjaná. **16** Ch̄e tmojáninŷēngā imojsécuentaye, ntšamo ch̄e bayējbe juabna uambayáftaca tojanopasama, y ch̄e cotšēngafaftaca ntšamo tojanopasámnaca. **17** Chora ch̄e entšanga tmojanontšé Jesúś impadánana ch̄e luarentšana chaotsatoñama.

**18** Jesúś ch̄e barquéshoye tojtanásëngō ora, ch̄e tempo bacna bayējbe juabna uambayá tbojanimpadá chabolesenciá cháftaca jama ca. **19** Pero ndoñe tbonjanlesenciá, sinó mëntsá tbojaniyana: “Acbe yebnoye motsatoñe, acbe pamíllangbioye, y cochjácuntaye ndayá Bëngbe Utabná ácaftaca tojamama, y ntšamo cha ácbioye tcmojalastemama ca.”

**20** Chentšana, chë entšá yojtsatoñé y tojanontsé Decápolis uabaina pueblenguenache jacúntana lempe ntšamo Jesús cháftaca tojanmcá; y nýetscanga imojsenjnanaye.

*Jesús canýe shembásabioye tbojanshná y Jairëbe bembetémbioye tbojtanayená  
(Mt 9.18-26; Lc 8.40-56)*

**21** Chentšana, Jesús cachiñe chë uafjajónaye chenguana tojesaná barquëshañé. Chocna ba entšanga tmojanobuashconá, y Jesús chë uafjajónaye tsachañé yojtsemna. **22** Chorna, tojánashjangó chë judiëngbe enefjuana yebnentša canýe mandayá, Jairo ca uabainá. Jesúsbioye tbojáninýe ora, chábentse tojanoshéntsamentssé, **23** y tša ibojtseimpadana, mëntšá: —Atšbe bembetema ya echantsóbana; Diosmanda mabo, acbe cucuatšënga chábeñe cochjajájua, salud chauatinýenama y cháuatayenama ca.

**24** As Jesús cháftaca tojána; pero bëtscá entšanga imojséstona, chábioye imojsenatséntšenaye.

**25** Chë entšanguentse yojtsaye canýe shembásá šocá; cha ya bnëtsana uta uata oboftjajuanánaca inapadecena. **26** Cha puerte tojansufrí, ba ashnayëngbe cucuatšiñe, y lempe ntsachetšá inabomncá tojanpochocá jenóshnama; pero ndoñe ibontsatstécacjana, nýe más peor ibojtsobiamnaye. **27** Chë shembásá yojouena ntšamo Jesús ba šoquënga tojánashnama, y as stëtšoicana entšangbe tséntsajana yojobeconá, y Jesusbe entšayá yojauábojajo. **28** Cha chca tojanma, er yojtsejuabnaye: “Masque nýe mo chabe entšayá sibiájua chaijuábojajo, y

salud chantsatsbomna ca.” <sup>29</sup> Y cachora chë oboftjajuanana iboxtsobojuána; y chabe cuerpiñe ibojebiónana ya tšabá yojsatsmënama. <sup>30</sup> Chora Jesú斯 yojaséntia chábentšana obenana yojóbocnama, mo ndábiye tbojashná orcá; as cha tojanobuértana entsángbeñe y tojanatjá: —¿Nda atšbe entšayá tojuabojo ca?

<sup>31</sup> Chabe uatsjéndayënga tmojanjuá: —Aca chtonýá chë entšanga cmontsatséntsená, y cabá cochjátsnoticiaye nda entšayá tojuabojo ca.

<sup>32</sup> Pero Jesú斯 cátoye yojtserreparana jinÿama nda tbojánbojajuama. <sup>33</sup> As chë shembásá, chë ntšamo cháftaca yojopásama jtsetatšëmbëse, tojanobeconá ngmëmnayá y auatjananá, chabe natsanoica tojanoshëntsamentšé, y lempe ntšamo ndegombre cháftaca tojanopasacá Jesúsbioye tbojaniyana. <sup>34</sup> Chora Jesú斯 tbojaniyana: —Bembe, Bëngbe Bëtsábeñe icošbuachéyeca shnaná contsatsmëna. Natjémbana motsatoñe; acbe šocana tontsopochocá ca.

<sup>35</sup> Jesú斯 cabá yojsóyebuambantscuana, báseftanga tmojánashjajna chë judiëngbe enefjuana yebnentša mandayabe yebnocana, y chë shembásetembe taitá tmojaniyana: —Acbe bembe tontsóbana; ¿ndayama más Buatëmbayá chama cochjátebëyaboma ca?

<sup>36</sup> Y Jesú斯, ntšamo chënga imojsichamcá ntjatuencá chë judiëngbe enefjuana yebnentša mandayábioye tbojaniyana: —Ndoñe matauatjana. Nÿe Bëngbe Bëtsábeñe cochtsošbuáchiye cha tšabá chaotsatsmënama ca.

<sup>37</sup> Y Jesú斯 ndoñe tonjanalesenciá Jairëbe yebnoye banga chamuastama; nÿe Pedro,

Santiago y Juan, Santiajbe uabentsana, aíñe.<sup>38</sup> Chentšana, chë mandayabe yebnoye tmojánashjajna ora, Jesúz tojánanë entšanga tsa imojtsenbouenana, entšanga imojtsošachiye y puerte ngménaca imojtseyoye.<sup>39</sup> As chë yebnoye tojánamashëngó y chë entšanga tojanëyana: “¿Ndayama tsa šmojtsenbouenana y tsa šmojtsendëntjana? Chë shembásetema ndoñe chenatóbana, nÿe endëtsomañe ca.”

<sup>40</sup> Pero entšanga nÿe imojtsáfchaye. As Jesúz nÿetsca entšanga shjoye tojtanëbuacna, y tojéftsanëbiatše chë basetembe bëtsëtsata y chabe enutënga; y chë shembásetema yojtsemnoye tojánamashëngó.<sup>41</sup> Chora Jesúz tbojanábuacueshache y cachëngbe biyañe tbojaniyana: “Talita, cum ca.” (Chca endayana “Shembásetema, matëtsbaná ca.”).

<sup>42</sup> Cachora, chë bnëtsana uta uata bomna shembásetema tojtantsbaná y yojtsobena jama. Y chë entšanga chama imojtsenjnanaye.<sup>43</sup> Pero Jesúz corente tojanamëndá ndocnábeñe chama ntsecuéntayana ca, y tojanamëndá chë básetema saná chamuiyé chaosama.

## 6

### *Jesúz Nazaret puebloca (Mt 13.53-58; Lc 4.16-30)*

<sup>1</sup> Chentšana Jesúz tojéftsanbocna y cachabe luaroye tojtanashjango, y chabe uatsjéndayënga cháftaca tmojána. <sup>2</sup> Ochnayté tojanobuache ora, Jesúz tojanontsé chë judiëngbe enefjuana yeb-nentše entšanga jabuátambana.

Chë ba entšanga cha jóyebuambayama tmojanuenëngä, imojenjnaná y tmojánayana: “¿Ndémoca quem boyabásä lempe chca tojuatsjinÿe? ¿Ndaye osertánana mua tmojatšetá, y ntšámoyeca cha yojtsobena chca bëts soyënga itsamana ca? <sup>3</sup> ¿Mua ndoñe chë calpintero yondmëna, Mariybe uaquiñá, y chabe catšátanga ndoñe mondmëna Santiago, José, Judas y Simón; y chabe uabénangnaca muentše ndoñe bëngtaftaca mondoyena ca?” —chënga imojsichamo.

Chë causa chënga tmojanotjayaná, y ndoñe montseboše joyeunayana. <sup>4</sup> As Jesú斯 tojanéyana: “Nýetsca luarënguenache canÿe Bëngbe Bëtsabe juabna oyebuambnayábioye bëtsá jabemana, pero ndoñe chca cachabe luarentše, ni cachabe pamíllangbenache, ni cachabe yebnentše ca.”

<sup>5</sup> Chë entšanga chentše chábeñe ndoñe montsanošbuaché causa, Jesú斯 ndoñe tonjanobená ni canÿe bëts soye Bëngbe Bëtsabe obenánaca chentše jëftsemana; nýe básefta šoquëngbeñe cucuatšënga tojanajó y tojanashná. <sup>6</sup> Jesú斯 ojnananá yojtsemna cachábentša entšanga chábeñe ndoñe montsanošbuaché causa.

*Jesú斯, chabe uatsjéndayënga tojanichamó Bëngbe  
Bëtsabe améndayama jábuayenama  
(Mt 10.5-15; Lc 9.1-6)*

Chentšana, chë chaboye base pueblënguenache Jesú斯 yojánana, Bëngbe Bëtsabe soyëngama abuátambaye. <sup>7</sup> Y chë bnëtsana uta uatsjéndayënga Jesú斯 tojánachembo, y utáta ínøyoe tojanichamó, entšángbentšana bacna bayëjënga jtëbuacnama obenana jatšatayëse; <sup>8</sup> y mëntšá yojáuyana:

“Benachiñama tondaye šmattsambaye, nÿe canÿe jatjonëfja; ndoñe šmattsambaye saná, ni shecnaja, ni crocénana uasnanëchiñe. <sup>9</sup> Nduámanëshe šmochjesóshecochëtjo, y nÿe canýájua šmochjesíchëtjo ca.”

<sup>10</sup> Mëntsánaca tojanéyana: “Posada chacmojúyentšame yebnentše šmochtsoquedaañe inÿe puebloye játantscuana. <sup>11</sup> Canÿe luaroye chašmojáshajna y ndocná posada chacmonjuyentšame, y joyeunayama ndoñe chamontsebošese, chentšana šmochjésebocana, y shecuatšentša polvëshe šmochjésenstoto, chca, chéngbiuye jinýanÿiyama chënga ndoñe tšabá tšëngaftangaftaca tmonjamama ca.”

<sup>12</sup> Chentšana, chë uatsjéndayënga tmojéftsanbocana y entsanga imojánabuayiynaye, chë tšabe benache chámuatishachama, bacna soyënga amana jtsajbanase. <sup>13</sup> Entšángbentšana ba bacna bayëjënga tmojtanëbuacna, y ba šoquënga aceitíyeca tmojananëtotjo y tmojanashná.

*Ntšamo Juan chë Ubayaná tojanóbana  
(Mt 14.1-12; Lc 9.7-9)*

<sup>14</sup> Rey Herodes Jesusbiama yojátatšëmbona, er nÿetsquénache nÿetsca entsanga chabiama imo-jtsóyebruambnaye. Entšanga Jesusbiama imojsichamo: “Juan chë Ubayaná obanënguentšana tojtayena, chiyeca cha chca obenana yojtsebomna ca.”

<sup>15</sup> Inÿengna imojsichamo: “Cha entsemna chë Bëngbe Bëtsabe juabna oyebuambnayá Elías ca.”

Yínÿengna: “Muana canÿa Bëngbe Bëtsabe juabna oyebuambnayá, mo chë tempsquëngcá ca.”

**16** Heródesna ntšamo entšanga Jesusbiama imojsichamcá tojanuena ora, tojánayana: “Mua Juan entsemna, chë atše sënjanmandá bestšaše chamotséstjanguamá, mora obanënguentšana tojtayena ca.”

**17** Juan cabá ainá ora, Herodes tojanmandá cha chamishache, cadenéjuangaca chamobátséca y chca cárceloye jutámiama. Herodes chca tojanma Herodíasbe causa, chabe uabentsá Felipbe shema. Herodes chë shémaftaca tojanobouamá, Felipe cabá ainá ora. **18** Y chama, Heródesbioye Juan ibojánbuayiynaye: “Ndoñe quenátslesenciana acbe uabentsabe shema acbe shema chaotsemana ca.”

**19** Chë causa, Herodías Juánbioye puerte ibojuáya, y yojánboše jtsóbama; pero ndoñe yontsobena, **20** er Herodes yojántatšëmbo, Juan canýe nýetsca soyënguiñé tšabá amá, nýe Bëngbe Bëtsábioye sempre oservená inamnama. Chama cha yojánauatja y ndoñe yonjanaleséncia cha chamóbama. Y Juan Bëngbe Bëtsabe soyëngama Heródesbioye tbojtsebuayiyná ora, ntšamo jajuaboyana ndoñe yontsetátšëmbo, pero masque chca, oyejuayá Juánbioye ibnayeunana. **21** Pero Herodías tojáninýena mocna ora Juan chamóbama. Heródesbe cumpleaño oboyejuaye ora, bëtscá saná tmojanprontá, y Herodes yojúbuaja chabe amëndayëngä, soldadëngbe amëndayëngä y Galileoca uámana entšanga. **22** Chora, chë oboyejuaye luaroye Herodíasbe bembe tojánamashëngo, tojanlantsá, y Herodes y nýetsca ófjanëngä chama tša imojsóyejuaye. As chë rey, chë tobiášbioye tbojaniyana: —Ñdayánaca

šmotjañe y atše cbochjátsetaye ca.

**23** Y jajúrase, mëntsá tbojanšbuachená: —Ntšamo chašcojotjañcá cbochjátsetaye, masque atšebe amëndayentša bomnanentšana tséntsañnaca ca.

**24** Chentšana, chë tobiasé yojéftsebocna y chabe mamábioye ibojatjaye: —¿Ndayá chjotjañe ca?

Y chabe mamá ibojojuá: —Juan chë Ubayanabe bestšaše ca.

**25** Cachora chë tobiasé betsco chë rey yojtsemnoye tojtanamáshëngó, y tbojaniyana: —Atše sëntseboše, cam ora Juan chë Ubayanabe bestšaše canye šcnenëšiñe chašcuatsetá ca.

**26** Herodes chama corente tbojanongmé, pero chë entšangbe delante y jajúrase tbojanšbuachená causa, ndoñe yonjobenaye ntšamo tbojaniyancá jebëbuetámenana. **27** Cachora chë rey canye soldado ibojíchmua, Juanbe bestšaše chauiyëbama. **28** As chë soldado cárceloye tojána, Juánbioye bestšaše tbojtsanéstjangó, y canye šcnenëšiñe tojanamba. Chë tobiásbioye tbojanëntšabuaché, y chana, chabe mamábioye.

**29** Juanbe ústonënga chama imojátatšëmbona ora, choye tmojánashjajna, chabe cuerpo tmojésanocñe y jauátbontsama tmojána.

*Jesús shachna uaranga boyabásenga saná tojanacaredadó*

*(Mt 14.13-21; Lc 9.10-17; Jn 6.1-14)*

**30** Chë Jesús tojánichamonga chábioye tmojtanashjajna ora, lempe ntšamo tmojanmama y tmojanabuataambama cha tmojancuentá.

**31** Chora Jesús tojanéyana: “Cuajna ínjoye,

entšanga ndoyena luaroye, batšatema jóchnama ca.” Cha chca tojánayana, er tša entšanga imojsaye y imojsabébana; ni mo jasama ndoñe luare imontsebomna.

<sup>32</sup> As cánÿenga barquéshañe tmojtsanoñe, entšanga ndébínÿnoye. <sup>33</sup> Pero chëngä imojtsoñama entšanga tmojánanÿe, y ndémuanÿenga imojamnama imojtsetátshëmbo; chcasna, chë entšanga shecuátseca betsco tmojána, nÿetsca pueblënguentšana, y chëngbe natsana choye tmojánashajna. <sup>34</sup> Chentšana, chë barquéshoicana tojánastjango ora, Jesús ba entšanga tojánanÿe; chëngbiama tbojanongmé, er imojtsemna mo abuajénÿa ndbomna oveshëngcá; y tojanontsé ba soyëngama jabuátambana.

<sup>35</sup> Ya jetiñe yojtsemna orna, chabe uatsjéndayënga tmojanobobeconá y tmojaniyana: —Ya jetiñe entsemna, y quem luariñe ndocná quenatiyena. <sup>36</sup> Entšanga cuantichamuá, pueblotémëngoye y inÿe luarëngoye chamotsóñama, ndayánaca jasama chamobuámiñama ca.

<sup>37</sup> Y Jesús tojanëyana: —Tšëngtaftanga saná chëngbioge šmochjacaredádaye ca.

Chora chëngä tmojaniyana: —Crocénana queftsátsbomna, uta patse denario nÿetšá, chëfta entšangbiama saná jabuámiyama ca.

<sup>38</sup> As Jesús tojanëyana: —¿Bueta tandëše šmojtsebomna? Marrepáranga ca.

Ya imojtsetátshëmbo ora, tmojaniyana: —Shachna tandëše y uta beónata fséntsebomna ca.

**39** Chora Jesús entšanga tojanamëndá ínyoca ínyoca chamoshéntsjatbiamama. **40** As chënga tmojanotbiama patse patsënga y shachna bnëtsásanënga. **41** Chora Jesús chë shachna tandëše y chë uta beónata tojanca, y celoye jontješiyëse, Bëngbe Bëtsábioye chama tbojtanchuá. Chentšana chë tandëšënga tojanjatá y chabe uatsjéndayënga tojanayentsbuaché chë entšanga jatšatayama. Y chë uta beónatnaca nÿetscanga tojanéjátaye. **42** Nÿetscanga tmojanse jtoshachaye nÿetšá. **43** Y chentšana, chë tandëše y chë beonentšana ojamnëtémënga tmojanatbaná, y bnëtsana uta sbarécua tmojanajutjé. **44** Chë saná tmojansënga imojamna shachna uaranga boyabásenga, shembásenga y bäsenga ntjacuntacá.

*Jesús békaye juatsbuacá yojsaye  
(Mt 14.22-27; Jn 6.16-21)*

**45** Chentšana, Jesús chabe uatsjéndayënga tojanamëndá chë barquëshoye jtašjnama, chë uafjajónaye chenguana jangana y chabe natsana Bet-saida ca uabaina pueblocá jashjajnana. Chënga imojtsebocanëntscuana, Jesús chë entšanga yojitchamuá. **46** Nÿetscanga tojtanadiosoftá ora, tjoye cha tojtsanoñe Bëngbe Bëtsáftaca jencuéntama.

**47** Yojtseibétatana ora, chë barquësha uafjajónaye tséntsaca yojsamna, y Jesús, canÿa fshantsoca. **48** Jesús tojáninë chëngbiama totcá yojtsemna, chë barquëshaca natsanoye jtsayana, er binÿia chëngbe contra yojtsemna. Ya binÿana ora, chëngbiowe yojobeconá, békaye juatsbuacá yojsaye, y ya chëngbiajana nÿe ndericho jachnënguama yojtsemna. **49** Y chënga,

chë békaye juatsbuacá cha yojtsayama tmojáninÿe ora, tmojanjuabó cha canÿe añemëse yojtsemna ca, y tmojanontshé yoyana; <sup>50</sup> er nÿetscanga chca tmojáninÿe y cochauatjanánëngä imojtsemna. Pero Jesú斯 cachora tojanéyana: “¡Añemo šmochtsebomna; atše Jesú斯 sëndmëna; ndoñe matauatjëngana ca!”

<sup>51</sup> Chorna, chëngä imojtsemna barquëshoye cha tojánaëengo, y chë jabuache binÿia tojanéjbana, y nÿetscanga puerte auatjanánëngä y ojnanánëngä imojtsemna. <sup>52</sup> Chëngä tmojáninÿe chëfta entšanga tandëse jujátayana, pero chëngbe ainanoca cabá ndoñe imontsobena josértana, Jesú斯 lempe jamma obená bétsemnama.

*Genesaret ca uabáinoca Jesú斯 ba šoquëngä tojanashná*

(Mt 14.34-36)

<sup>53</sup> Chë uafajónaye tmojánenashbuachengo ora, Genesaret ca uabaina luaroye tmojánashjajna, y chë uafajónaye tsachoca chë barquësha tmojanëtsbua. <sup>54</sup> Chë barquëshoicana tmojánastjajna y cachora entšanga Jesú斯 tmojantëmbá. <sup>55</sup> Chíyeca, chë luariñe yebnënguenache betesco chëngä tmojána, y tmojanontshé chë šoquëngä tjuashënguiñe juyambana, chë ndémoye tmojanuena Jesú斯 yojtsemna luaroye. <sup>56</sup> Y ndayentse cha tojámashëngüentse, pueblënguiñe, bëts pueblënguiñe y base pueblotémënguiñnaca, chë šoquëngä benachoye imojtsëbuacana, y Jesú斯 corente imojtseimpadana chë šoquëngä chaualesenciá, nÿe mo chabe entšayá sibuájua

juabojuajuana. Y nÿetscanga tmojuábojajëngä tšabá imojsatsmëna.

## 7

*Ndáyeca canÿe entšá Bëngbe Bëtsabe delante ndoñe tšabia nántsemna  
(Mt 15.1-20)*

<sup>1</sup> Chentšana, fariseunga Jesúsbioye tmojanobeconá y báseftanga ley abuátambayëgnaca, Jerusalenocana áshjajnëngä. <sup>2</sup> Chënga tmojáninÿe básefta Jesusbe uatsjéndayëngä, cabá ndase ora, ndoñe montsacuentšabiá ntšamo chë judiëngä imojanamancá. <sup>3</sup> Er chë fariseunga y nÿetsca judiëngä imojanamana jtsacuéntšabiana ba soye, ndayá jasama ora, ntšamo chëngbe bëts taitanga imojanamancá. Chënga imojanjuabná, chca jtsamëse Bëngbe Bëtsabe delante tšábenga jtsatsmënama ca. <sup>4</sup> Chë sananga enocana tmojtashjangó ora, ba soye ndoñe tmontsácuentšabese, tondaye ntjasana; y ba soyëgnaca imojánama, pero nÿe chëngbe bëts taitanga chca jamana imojanamánayeca, mo chë békayeca juabáyana tazësëngä, matbajëngä, calderëshëngä y jutsnëshangá. <sup>5</sup> Chë causa, chë fariseunga y chë ley abuátambayëngä Jesús tmojantjá: —Ndáyeca acbe uatsjéndayëngä ndoñe montsama ntšamo bëngbe bëts taitanga monjanamancá, y montsesá ntsacuéntšabiese, ndoñe ntšamo bëngä judiëngä fsënduamancá, Bëngbe Bëtsabe delante tšabá jtsatsmënama ca?

<sup>6</sup> Chora Jesús tojanëyaná: —Nÿe tšabá chë Bëngbe Bëtsabe juabna oyebuambnayá Isaías tšëngtaftangbiama tojánayana, bacna

entšanga chë ntšamo ndegombre šmojuabnacá ndinÿinÿnayëngä ca, mëntsá enduabemanentše:  
 Quem entšanga mondbétsichamo Bëngbe Bëtsá tša  
 tšabia yomna ca; chca nÿe uayásaca,  
 pero chëngbe ainanentše ndocna tšabe  
 juabnëngaca.

<sup>7</sup> Pero chënga nÿe bonamente mondbétsichamo Bëngbe Bëtsá tša tšabia yomna ca;  
 chënga nÿe entšangbe mandënga jtsabuátambayana, y Bëngbe Bëtsabe  
 mandënga ndoñe ca —cha tojanayana.

<sup>8</sup> Chora Jesú斯 tojanëyana: —Ntšamo Bëngbe Bëtsá tojanmandacá stëtšoye tšëngtaftanga šmojtsequedá, nÿe ntšamo entšanga monduamancá jtsamama ca.

<sup>9</sup> Y mëntsánaca tojanëyana: “Tšëngtaftanga ntšamo Bëngbe Bëtsá tojanmandacá stëtšoye jtsequédana, nÿe ntšamo tšëngtaftangbe anteunga imojanamancá jtsamama. Tšëngtaftanga jtsejuabnayana tšabá šmojtsama ca chca šmojtsama ora. <sup>10</sup> Moisés tonjánayana: ‘Acbe bëtsétsata ndoñe stëtšoye catjáquedaye’, y ‘nda chabe bëtsétsatbiama ndoñe tšabá tonjoyebuambá chana, jóbanama jtsemnana ca.’

<sup>11</sup> Pero tšëngtaftanga šmondbétsichamo, canÿe entšá yobena chabe taitá o chabe mamá jáuyanana: ‘Lempe sëndbomna soyëngä corbán entsemna, chíyeca ndoñe quetsátobena juajabuáchana ca’ (corbán endayana “Bëngbe Bëtsabiama uátsëmbona soyëngä ca”). <sup>12</sup> Tšëngtaftanga šmondbétsichamo, nda chca tojayanëse, ya ndoñe obligaciónaca ntsemnana chabe taitá o mamabiama ndayánaca jamama ca. <sup>13</sup> Chca,

tšëngaftanga šmontsama entšanga Bëngbe Bëtsabe palabra stëtsoye chamoquedama, mo tondaye tontsamancá, chë cuenta jtsamama ntšamo anteunga imojanamancá, ntšamo entšángbeñe tempscana y mëntscoñama yochnëjuancá. Y ba soyënga tšëngaftanga cachcá šmontsama ca” — Jesús tojánayana.

<sup>14</sup> Chora Jesús, cachiñe entšanga tojtanachembo y tojanéyana: “Nÿetscanga šmochjouena y chacmësertá. <sup>15</sup> Ndayá entšá tojtzesacá, ndoñe ntjábemana ndoñe tšabia Bëngbe Bëtsabe delante. Inÿetšá comna: ntšamo entšá tojtsejuabná y tojtsoyebuambnacá endobena jabemana ndoñe tšabia Bëngbe Bëtsabe delante. <sup>16</sup> Chë jouenama tmojtsobenënga, šmochjouena ca” —cha tojánayana.

<sup>17</sup> Jesús entšanga tojéftsanabashejuana y yebnoye tojtanamáshëngó ora, chabe uatsjéndayënga tmojantjá ntšamo cha tojánayanama. <sup>18</sup> As cha tojanéyana: “¿Tšëngaftángnaca cabá ndoñe cmontsësertana ca? ¿Cabá ndoñe cmontsësertana, lempe ntšamo entšá tojascá ndoñe ntsobenana chábioye jabemana ndoñe tšabia Bëngbe Bëtsabe delante; <sup>19</sup> er ainanoye ndoñe ntjómashëguana, sinó uafsbioye, y chentšana cuerpentšana jtabocnana ca?”

Y chca, Jesús tojánayana nÿetsca sananga tšabá jasama yomna ca y chë saná ndoñe ntjamana canëe entšá bacna soye chaotsamama ca. <sup>20</sup> Y mëntsánaca tojánayana: “Ntšamo chë entšá tojtsejuabná y tojtsoyebuambnacá, chë soye cocayé endobena entšá jabemana

ndoñe tšabia Bëngbe Bëtsabe delante. <sup>21</sup> Er ainanocana jtsóbocanana bacna juabnënga: shembásuftaca o boyabásuftaca bacna soye jamama, jatbëbama, jóbama, <sup>22</sup> bacna juabnënga boyá o shémbioye ínÿaftaca jaíngñama, jtsatbomnayama, nÿetsca bacna soyënga jamama, ínÿenga jáingñama, nÿe cachá jenomándama ntsobercá jtsiyenama, ínÿabioye jtsántshabošama, ínÿabiama jtsayátsenayama, jtsenábotamnayama y nÿe opënga jtsobiamnayama. <sup>23</sup> Nÿetsca quem bacna soyënga entšabe ainanocana jóbocnana, y cha jabemana ndoñe tšabia Bëngbe Bëtsabe delante ca” —cha tojánayana.

*Canÿe shembásä inÿe luarocana ashjangoná  
Jesúsbeñe yojtsošbuaché*  
(Mt 15.21-28)

<sup>24</sup> Jesús chentšana, Tiro ca uabaina luaroye tojtsanoñe, y canÿe yebnentše tojánamashëngó. Cha yojtseboše ndocná chama chaondétsetatšëmbuama; pero ndoñe yonjobenaye iytëmenana jatsmënnana. <sup>25</sup> Y betsco, canÿe shembásä, canÿe bembe bacna bayëjbe juabna uambayá ibnabomná, Jesusbiama oyebuambnayana yojouena ora, chábioye tojánabo y chabe shecuatšentše tojanoshëntsamentšé. <sup>26</sup> Chë shembásä ndoñe yonjamna judiá, sinó Sirofenicia luarocá. Tojánabo y Jesúsbiye tbojanimpadá chabe bembetémbentšana bacna bayëja chabuatábocnama. <sup>27</sup> Pero Jesús tbojaniyana: —Atše šondmëna natsana judío entšangbiama chë soyënga jamana; chentšana cocayé chanjobenaye chca inÿe entšangbiama

jamana. Atše acbiama, canëe ndoñe judiá, soyënga stjamëse, nántsemna mo chë bäsengbe saná quešënga cuafstsëbuajocá ca.

**28** Y cha tbojanjuá: —Arseñor, chca jtsemnana. Pero chë quešëngnaca mondbase chë bäsenga tmojtsesá ora tmojatquécjanatemënga. Chcasna, Diosmanda átśnaca šmotsajabuache ca.

**29** As Jesús tbojaniyana: —Tšabá tcjayana; chcasna, acbe yebnoye motsatoñe. Chë bacna bayëja acbe bembetembentšana tonjésebocna ca.

**30** Chentšana, chë shembása chabe yebnoye tojtaná, y tbojáninýena chë bembetema jutsnéshentše yojtsojájoñe, y chë bacna bayëja ya ndoñe chábeñe yontsemna.

### *Jesús, canëe boyabásá tésmá y ndëbiábioye tbojanshná*

**31** Tiro pueblentšana Jesús tojéftsanbocna, y Sidón y Decápolis luarentša pueblëngüejana jachnënguse, Galilea uaffajónayoye tojánashjangó.

**32** Cha chentše yojtsemna ora, chábioye tmojanánatse canëe entšá tésmá y ndëbiá, y tmojanimpadá chabe cucuatšënga chë šocábeñe chaojájoma, chaboshnama. **33** Chorna Jesús entšángbentšana luaroye tbojanánatse, cánýata. Chora chë šocabe matscuašoye ntšabuafjënga yojajué, cucuatšiñe yojabuashëtjo, y chë šocabe bichtaja yojábojajo. **34** Chentšana, Jesús celoye tojanontješé, jabuache yojáshachna, y hebreo palabriñe tbojaniyana: “¡Efata ca!” (Chca endayana “¡Chacmotsauenana ca!”)

**35** Cachora, chë boyabásabe matscuaše tšabá yotsatsmëna y tšabá yojtsuenana; chë bichtaja tšabá

yojtóbema y tšabá yojtsóyebuambnaye. <sup>36</sup> Y Jesúś chë entšanga tojanamëndá chama ndocnábeñe ntsecuéntayana. Pero masque tša chama yojtsamëndaye, entšanga más chabiama imojsencuéntaye. <sup>37</sup> Chama chë entšanga puerte imojsen-jnanaye, y mëntsá imojsichamo: “¡Lempe tšabá entsama! Chë tësmënga chamouenama, y chë ndëbianga chamóyebuambama entsama ca.”

## 8

*Jesús canta uaranga entšanga saná  
tojanacaredadó  
(Mt 15.32-39)*

<sup>1</sup> Chë tempo, ba entšanga Jesúśbioye cachiñe tmojanobeconá, y jasama tondaye imontsebomna. As Jesúś chabe uatsjéndayëngä tojánachembo y tojanëyana: <sup>2</sup> —Quem entšangbiama šontsengmena, er ya unga te átseftaca montsemna y mora jasama tondaye quemátsbomna. <sup>3</sup> Cachëngbe yebnoye tondaye ntjascá stichamuase, shëntsama benachëjana nantsabuatëcja; y báseftanga bën luarocana tmojabo ca.

<sup>4</sup> As chabe uatsjéndayëngä tmojaniyana: — ¿Ntšamo nda nanjobenaye quem luarentše, ndocna entšá ndoyenentše, chëfta entšangbiama saná jinÿenama ca?

<sup>5</sup> Chora cha tojanatjá: —¿Bueta tandëše šmotsebomna ca?

Y chëngä tmojanjuá: —Canÿsëftaše ca.

<sup>6</sup> Chentšana, Jesúś tojanamëndá entšanga chamoshëntsjatbiamama. Chorna, chë

canýsëfta tandëše tojanca y Bëngbe Bëtsábioye chama tbojtanchuá. Chentšana tojanjatá, chabe uatsjéndayënga tojanéjatá, y chëngna chë entšángbiyoye. <sup>7</sup> Båsefta beonatémëngnaca imnabomna; as Jesú, Bëngbe Bëtsábioye chama tbojtanchuá y chabe uatsjéndayënga tojanamëndá entšanga jujátayama. <sup>8</sup> Nÿetscanga tmojanse jtoshachaye nÿetšá. Chentšana cabá canýsëfta bëts sbarécua tmojanajutjé chë ojamnëtémëngaca. <sup>9</sup> Chë tmojansënga imojamna mo canta uaranga nÿetšá. Chentšana Jesú chë entšanga tojtanadiosoftá. <sup>10</sup> Chora Jesú barquëshañe tojánenojayiye chabe uatsjéndayëngtaftaca, y tmojtsanoñe Dalmanuta ca uabaina luaroye.

*Chë fariseunga tmojánbošena, Jesú chaoma canýe bëts soye, chabe ndegombre obenana jinýama (Mt 16.1-4; Lc 12.54-56)*

<sup>11</sup> Chentšana, fariseunga tmojánabo y tmojanontšé Jesúseftaca enatsëtsnayana. Y jisháchichiyama, imojtseimpadana canýe bëts soye chaoma, as jtsetatšëmbuama Jesusbe obenana Bëngbe Bëtsábiocana ndegombre tainóbocanama. <sup>12</sup> Y Jesú ngménaca, jabuache yojáshachnëse, mëntšá tojánayana: “Ndáyeca tšëngtaftanga, chë mora oyenënga, šmojtseboše canýe bëts soye chaimama tšëngtaftanga atšbe obenana jinýanýiyama ca? Ndegombre cbéyana, quem entšanga ndocna chca soye quemochátinýe ca.”

<sup>13</sup> Chorna chë entšanga cachcá tojesanënýá, chë barquëshoye yojtamáshëngo, y uafjajónaye chenguana yojtsoñe.

*Jesús tojanabuayená fariseungbe buatëmbana soyëngama  
(Mt 16.5-12)*

<sup>14</sup> Chë uatsjéndayëngä yojésebnëtjomba ndaye soye jasama jesocñama, y chë barquëshoye nÿe canÿe tandëše imojtsebomna. <sup>15</sup> Jesús tojanëyana: —Smochtsantješna; cuedado šmochtsebomna fariseunga y Heródesbe levadurama ca.

<sup>16</sup> Chora chë uatsjéndayëngä tmojanontsé enatsëtsnayana: —Chca entsichamo, bëngä tandëše ndoñe tmonjesocñama ca.

<sup>17</sup> Jesús yojtsetátshëmbo, chabe uatsjéndayëngä imojtsejuabnaye chana tandëšama yojtsëtsëtsnaye ca; pero ndegombre chana yojtsóyebuambnaye ndayá ntšamo fariseunga y Herodes bacna soyëngä jtsamëse imojoyenama. Chcasna, mëntšá tojanëyana: —¿Ndáyeca tandëšama šmojtsoyebuambná? ¿Cabá ndoñe cmontsertana, ni šmontsetátshëmbo? ¿Ainanoca ndoñe šmontseboše chacmësertama? <sup>18</sup> Bominë šmondbomna, pero ndoñe quešmátobena jinÿana; jouenama šmondobena, y ndoñe quešmátuénana, y ndayá tijamama ndoñe quešmatsjuabná. <sup>19</sup> Chë shachna uaranga entšanga shachna tandësentšana sënjanëjatá chentšana, ¿bueta sbarécua chë ojamnëtémëngaca šmënjanajutjé ca? —cha tojanatjá.

Y chëngä tmojanjuá: —Bnëtsana utácua ca.

<sup>20</sup> —Y chë canÿsëfta tandësentšana canta uaranga entšanga sënjanëjatá chentšana, ¿bueta bëts sbarécua chë ojamnëtémëngaca šmënjanajutjé ca?

Y chëngä tmojanjuá: —Canÿsëftácua ca.

**21** As Jesús tojanéyana: —¿Y cabá ndoñe cmontsésertana ca?

*Jesús canye jtanábiye tbojanshná, Betsaida pueblocá*

**22** Chentšana tmojánashjajna Betsaida pueblocá; y chora, entšanga canye boyabása jtaná Jesúsbiye tmojanánatse, y tmojanimpadá cha jabojuana chabotseshnama. **23** As, chë jtanábiye tbojanábuacueshache, y chë pueblo chaboye tbojanánatse. Chorna, yebuáyeca ibojabuchanëtjo, y chábeñe cucuatšënga yojajájua, y tbojantjá nderado ndayá jinÿama tayoitsanobena ca. **24** As chë jtaná yojontješiye y tojánayana: —Boyabásenga sëntsénÿa; mo betiyëngcá montsemna, pero montsobonjná ca.

**25** Chora Jesús, chë jtanabe fsnëbeñé cachiñe cucuatšënga yojajájua. Y chë boyabása yojtsobena lempe tšabá jinÿama; ya shnaná yojtoquéda. Y yojtsobena nÿetsca soyëngá botamana jinÿana. **26** Chentšana, Jesús cachabe yebnoye tbojtanichmó y mëntsa tbojaniyana: —Chë puebloye ndoñe catjéftsamashëngó ca.

*Pedro tojánayana, Jesús chë Cristo bétsemnama  
(Mt 16.13-20; Lc 9.18-21)*

**27** Chentšana, Jesús tojánbocna chabe uatsjéndayëngäftaca Cesarea de Filipo luaroca pueblëngoye, y benachiñe chabe uatsjéndayëngä tojanatjá: —¿Nda atše bétsemnama ca entšanga imojsichamo ca?

**28** Y chëngá tmojaniyana: —Inÿenga montsichamo Juan chë Ubayaná ca, ínÿengna

Elías ca, y ínÿengna, canÿe Bëngbe Bëtsabe juabna oyebuambnayá ca.

<sup>29</sup> As Jesú斯 tojanatjá: —Y tsëngaftangna, ¿nda atše bétsemnama ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

<sup>30</sup> Chentšana Jesú斯 corente chënga tojanamëndá, chë nda cha yojamnama ndocnábeñe ntsecuéntayana.

*Jesú斯 tojánayana cha ibojamna jóbanana y jt-sayenana ca*

*(Mt 16.21-28; Lc 9.22-27)*

<sup>31</sup> Y Jesú斯 tojanontsé chabe uatsjéndayëngä jabuátambana, cha, chë Bëngbe Bëtsá Entsá tbojanbemá, ibojamna puerte jasúfriana ca; chë judiëngbeñe bëtsëjemëngcá amëndayëngbiama, chë judiëngbe más uámana bachnangbe amëndayëngä y ley abuátambayëngbiama uabotená jtsemnana ca. Entšanga mochjanóba, pero unga tianoye yochtanayena ca. <sup>32</sup> Nÿetscanga catafjosertaycá chama yojtsóyebuambnaye. As Pedro, Jesúsbioye luaroye tbojanánatse, y tojanontsé jtsáuyanana. <sup>33</sup> Pero Jesú斯 yojbuértana, chabe uatsjéndayëngä tojanënýanýé, y Pédrëbioye mëntsá tbojtsanbochembo: “¡Satanás, átšbentšana mojuaná! Pedro, acbe juabnëngä Bëngbe Bëtsábiocana ndoñe quenatóbocana, sinó nÿe entšángbentšana ca.”

<sup>34</sup> Chentšana, Jesú斯 chabe uatsjéndayëngä y chë inÿe entšanga tojánachembo chamouenama, y tojanëyana: “Nda atšebe uatsjendayá jtsemnama tojtseboše, cháuayana nÿe Bëngbe Bëtsá yobena

sempre chabe vidiñe jtsemándayana ca, chabe quem luarentša soyënga cachcá chauesonýá atše juastama, y atšbiama jasúfriama chaotseprontana y cruciñe jobanámnaca. <sup>35</sup> Nda tojtsama quem luarentše bëtscá soyënga jtsebomnana y atšbiama jasúfriama ndoñe tontseprontana, chë nÿetsca tescama yomna tšabe vida echanjopérdia. Pero nda quem luarentša soyënga cachcá tojëftsonýá atše juastama, y chë tšabe noticiëngä atšbiama abuátambaye causa, masque chaóbana, chë nÿetsca tescama yomna tšabe vida echántsebomna. <sup>36</sup> ¿Ndayama entsá buanjosérvia nÿetsca quem luarentša soyënga jtsebomnana, chë nÿetsca tescama yomna tšabe vida tojtsoperdese? <sup>37</sup> Er canjë entsá chë nÿetsca tescama yomna tšabe vida tojtsoperdese, ndocna soye quenátmëna cha chaobená joyiyama, chë nÿetsca tescama yomna tšabe vida jtsebomnana. <sup>38</sup> Chcasna, nda mora atšbiama y atšbe buayenana soyëngama tojtsëuatja entšángbeñe, chëngä chë Bëngbe Bëtsabima nduauenanëngä y bacna soye amëngä, chë Bëngbe Bëtsá Entsá tbojanbemánaca chabiama echantsëuatja, chabe Taitabe bëts obenánaca y chabe angelëngtaftaca chaojésabo ora ca” —cha tojanéyana.

## 9

<sup>1</sup> Mëntshánaca Jesús tojanéyana: “Ndegombre cbéyana, báseftanga muentše montsemnëngä ndoñe quemochatóbana, Bëngbe Bëtsá entšángbeñe chabe obenánaca jabomándama jabana ntjëftsinýca ca.”

*Jesús inyetšá tojanobinýná  
(Mt 17.1-13; Lc 9.28-36)*

**2** Chentšana chnēnguana tianoye, Jesús tojéftsanëbiatše Pedro, Santiago y Juan, y ínøyoe tojanénatse nýe chënga, canýe bëts tjoye. Y chëngbe delante Jesús inyetšá tojanobinýná; **3** chabe uichëtjonëjuangá tsa yojtsabuashinýinyana; corente uafjantsëjuangá yojtsamna; nýa chca juafjantsama ndocná quem luarentše quentatobenaye. **4** Chca orna, chë uatsjéndayëngä tmojáninýe, Moisés y Elías tbojanobinýná Jesúseftaca encuéntaye.

**5** Chora Pedro, Jesúsbiye tbojaniyana: “¡Buatëmbayá, tsa tšabá bëngbiama cuanmëna muentše jtsemnana ca! Mora fchanjapórma unga tambotémëngä: cánýetema acbiama, ínýetema Moisesbiama y ínýetema Elíasbiama ca.”

**6** Chca tojánayana, chë uatsjéndayëngä yapa auatjanánëngä imojtsemna causa, y Pedro ndoñe yontsetátshëmbo ntšamo jayanana. **7** Chora canýe jantsetëshe yojóbema, y chëngbiye yojáutsbotse; y chë jantsetëshoicana canýe oyebuambnayana tojanóbocna, mëntsá: “Mua atšbe bonshana Uaquiñá endmëna; cha šmochtseyeunana ca.”

**8** Y ndeolpe, chëngbe shéconana tmojanrrepará ora, ya ndocná más tmonjáninýe; nýe Jesús canýa chëngtaftaca yojtsemna.

**9** Chë tjocana imojtsatstsmaye ora, Jesús chë uatsjéndayëngä tojanamëndá: —Bëngbe Bëtsá Entšá tbojanbemá obanënguentšana candëtayenëntscuana, chë mënté tjoca šmonjinýe soyama ndocnábeñe šmattsecuéntaye ca.

<sup>10</sup> Chë uatsjéndayëngä aíñe chca tmojanuena; pero chënga imojsentjanaye ndayá cha yojtsentsháyana, cha yochtanayena ca cha tojánayana ora. <sup>11</sup> Y Jesúsbioye imojtsetjanaye: — ¿Ndáyeca chë ley abuátambayëngä mondbétsichamo, canmëna Bëngbe Bëtsabe Úámana Uabuayanabe natsana Elías jabana ca?

<sup>12</sup> As cha tojanéjua: —Ndegombre, canÿa Eliascá natsana echanjabo, y ntšamo jtsemnama yomncá lempe echánjabatsma. Pero ntšamo Bëngbe Bëtsabe uabemana palabrënguiñe endayancana, Bëngbe Bëtsá Entšá tbojanbemá puerte caochjasúfria, y ínÿenga puerte camochtsáboyëngä ca. <sup>13</sup> Ndegombre cbéyana, canÿa Eliascá ya tonjabo, y cháftaca entšanga tmonjanma lempe ntšamo tmojabošencá, ntšamo chaochnënguama Bëngbe Bëtsabe uabemana palabrënguiñe endayancá.

*Jesús, canÿe basa bayéjbe juabna uambayábioye tbojanshná*

(Mt 17.14-21; Lc 9.37-43)

<sup>14</sup> Chentshana, chënga tmojtaná chë inÿe uatsjéndayëngbioye. Chora, Jesús tojáninÿe ba entšanga chë uatsjéndayëngbe shéconana imojsentjanaya, y básefta ley abuátambayëngna chëngtaftaca imojsenatsëtsnaye. <sup>15</sup> Njetsca entšanga cha tmojáninÿe ora, imojenjnana y tmojanótjajo cha jachuayama. <sup>16</sup> Chora Jesús chënga tojanatjá: —¿Ndayama chëngtaftaca šmenatsëtsná ca?

<sup>17</sup> Y canÿa entšanguentshá tbojanjuá: — Buatëmbayá, muentše ác bioye sënjuánatse atšbe

uaquiñá; bacna bayëjbe juabna entsambá, y chë causa, jóyebuambayama ndoñe quenátobena.

**18** Nye ndayéntsnaca cha tojtsemnentše, chë bayëja chábioye jishachana y jtsenajuáchesëniana; chentše uayoicana shashiye jtsabocanana, jtsenoftëšfjojnayana y obanacá jtsatsjájonana. Acbe uatsjéndayënga sënjaimpadá chë bacna bayëja chamuatábocnama, pero ndoñe chematobená ca —cha tbojaniyana.

**19** As Jesús tojánayana: —¡Nÿetsá ndošbuáchiyënga ca! ¿Buetayté šojtsemna tšëngtaftangaftaca jëftsemnana? ¿Buetayté uantado tšëngtaftangaftaca chjëftsemna? ¡Moye chë básetema mánatse ca!

**20** Chora chë básetema chábioye tmojanánatse; y chë bayëja Jesúsbioye tbojáninë ora, tojanma chë basa ataque chaboshachama, y chë basa fshantsoye yojashajaye, yojtsojanduounaye y uayoicana shashiye yojtsábocana. **21** As Jesús chë básabe taitábioye tbojantjá: —¿Buetayté chca yojtsepása ca?

Y cha tbojanjuá: —Básetema orscana chca; **22** ba soye, chë bayëja chábioye iñoye jtsatmetšana y buyeshoye jtashbuetšana, jtsóbama. Chíyeca, nderado ndayá chabiamajamama tcojtsobenëse, bëngë šmotsalastemá y šmotséjabuache ca.

**23** Chora Jesús tbojaniyana: —¿Ndáyeca “ndayá jamama tcojtsobenëse ca” šcjauyana? Nda Bëngbe Bëtsábeñe tojtsošbuáchebiama lempe endopodena ca.

**24** Y cachora chë básabe taitá tojanáyebuachená: —Aíñe, Bëngbe Bëtsábeñe sëntsošbuaché; Dios-manda, ¡más jtošbuáchiyama šmajabuache ca!

**25** Y bëtscá entšanga imojsójotoma Jesúś tojáninýe ora, chë bacna bayéja tbojtsanbochembo mëntšá: —¡Bacna bayéja, chë básetema tësmá y ndëbiá biamnayá; chábentšana maisebocna y ndocna te más chábeñe catjésamashëngó ca!

**26** Y chë bayéja chábentšana yojésebocna, yojtseyoye y chë básabioye jabuache ibojeseshatiyiyé; y chë básana mo obanacá tojanoquedá, y chë causa banga imojsichamo cha obaná yojtsemna ca. **27** Pero Jesúś tbojanábuacueshache y tbojtanatsbaná; y chë básana yojtëtsaye.

**28** Chentšana, Jesúś canýe yebnoye tojánamashëngó, y chabe uatsjéndayëngna luaroca cha tmojantjá: —¿Ndáyeca bënga ndoñe fsënjobená chë bayéja jtabocnana ca?

**29** Y Jesúś tojanéjua: —Chca bayéjëngä jtëbuacanamna jobenayana nýe Bëngbe Bëtsáftaca jencuéntase, chabuájabuachama jaimpádase ca.

*Jesúś cachiñe tojánayana cha ibojamna jóbanana y jtayenana ca*

*(Mt 17.22-23; Lc 9.43-45)*

**30** Chentšana tmojéftsanbocna ora, Galilea luarëjana imojsajna; y Jesúś yojtseboše chama ndocná chaondétsetatšëmbuama, **31** er cha chabe uatsjéndayëngä yojtsabuátambaye. Mëntšá cachabiamá yojanëtsëtsnaye: “Bëngbe Bëtsá Entšá tbojanbemá entšangbe cucuatšiñe mochanjáboshjona; mochanjóba, pero chentšana unga tianoye echántayena ca.”

**32** Pero chënga ndoñe yontsósertana ntšamo Jesúś yojtsanëtsëtsnacá, y chama jatstjanayamna chënga imojsauatja.

*¿Nda chë más uamaná yomna?  
(Mt 18.1-5; Lc 9.46-48)*

<sup>33</sup> Chora Capernaum puebloye chënga tmojánashjajna; y cach yebnentše imojtsemna ora, Jesús chë uatsjéndayëngä tojanatjá: “¿Ndayama benachiñë šmabáyenatsëtsnaye ca?” <sup>34</sup> Chëngna nÿe iytëca tmojanobiama, er benachëjana chënga immayénatsëtsnaye, chënguentşá nda chë más uamaná bétsemnama. <sup>35</sup> As Jesús tojanótbema, chabe bnëtsana uta uatsjéndayëngä tojánachembo y tojanéyana: “Ndánaca nÿetscangbiama chë más uamaná jtsemnama tojtseboşëse, cha chë más nduamaná chaóbema y nÿetscanga chaotsaservena ca.” <sup>36</sup> Chora Jesús canÿe básetema tbojánishache, chëngbe tsëntsaca tbojanatsá, tbojantbá y chënga tojanéyana: <sup>37</sup> “Ndánaca, átsbeñe ošbuachiyá bétsemnayeca, tbojofja canÿa mo quem basetemcá, chana atše jofjana; y nda atše šojofja, chora cha nÿe atše ndoñe ntjofjana, sinó chë šojichmó chábioynaca jofjana ca.”

*Nda ndoñe bëngbe contra tontsemná, bëngtaftaca jtsemnana*

*(Mt 10.42; Lc 9.49-50)*

<sup>38</sup> Juan, Jesúsbioye tbojaniyana: —Buatëmbayá, bëngä fsënjinÿe canÿe boyabása, y cha aca jótšëmbonëse, bacna bayëjbe juabna entšángbentşana endëtëbuacana; pero cha bëngtaftaca ndoñe quenátsmëna causa, chama fsënjesauyaná ca.

<sup>39</sup> As Jesús tbojanjuá: —Ndoñe šmatjuauyaná; er ndocná quenátobena canÿe bëts soye jamana Bëngbe Bëtsabe obenánaca, atše jótšëmbonëse,

y chentšana atšbe contra jatóyebuambnayana.  
**40** Ndegombre, nda ndoñe bëngbe contra tontsemná, bëngaftaca jtsemnana. **41** Y ndánaca, masque nÿe búyeshtema tšëngtaftanga tcmojubuatšatá, tšëngtaftanga átšbenga bétsemnayeca, chábioye Bëngbe Bëtsá canÿe uacanana soye bochántatšetaye, cha chë tšabe soye tojamama ca.

*Resjo yomna, nderado bacna soyënga cuanjama  
(Mt 18.6-9; Lc 17.1-2)*

**42** Chentšana Jesús tojánayana: “Canÿa átšbeñe ošbuachiyábioye mo quem basetemcá, nda tbojaingñé atše ustonama chaotsajbanama, más tšabá chabiama nántsemna canÿe bëts nantsnëbé chamotsetamošéntšbuia y mar békayoye asentoye chamotsashbuetše chabotsenatjëmbama.  
**43** Nderado acbe cucuátšeca bacna soye tcojama, más tšabá nántsemna chë cucuatše chacotsenacuéstjango. Acbiama más tšabá endmëna celoye jamashënguana nÿetsca tescama vida jtsebomnama, nÿe canÿe cucuatše bomná, y ndoñe nÿets útatšeca infiernoye chacmotocá jama, chë ndocna te yochanjáfsana íñeshoye; **44** chocha útšenënga puerte nÿetsca tescama mochanjasúfria. Chéngbioye mochtsasaye mamanga ndocna te quemochatóbana, y chë íñeshe ndocna te queochátsfsana.

**45** “Nderado acbe shecuátšeca bacna soye tcojama, acbiama más tšabá nántsemna chë shecuatše chacotsenashecuástjango. Acbiama más tšabá endmëna cosheto celoye jamashënguana nÿetsca tescama vida jtsebomnama, y ndoñe nÿets

útatšeca infiernoye chacmotsétšena; **46** choca útšenënga puerte nÿetsca tescama mochanjasúfria. Chéngbiye mochtsasaye mamanga ndocna te quemochatóbana, y chë íñeshe ndocna te queochátsfsana.

**47** “Nderado acbe bomínÿeca bacna soye tcojinÿe y cachca soye tcojama, más tšabá nántsemna chë bominÿe chacotsenobuchjátsëca. Acbiama más tšabá endmëna Bëngbe Bëtsabe améndayoye jamashënguana nÿe canÿe bominÿe bomná, y ndoñe nÿets útabeca infiernoye chacmotsétšena; **48** choca útšenënga puerte nÿetsca tescama mochanjasúfria. Chéngbiye mochtsasaye mamanga ndocna te quemochatóbana, y chë íñeshe ndocna te queochátsfsana.

**49** “Tamó tšabe soye endmëna. Ntšamo chë tamó canÿe tšabe soye endmëncá, Bëngbe Bëtsá echanjama nÿetsca tšëngtaftangbiama tšábenga chašmotsemnama, chë átšbeñe betsošbuáchema šmojtsepadecena ora šmojauantase. **50** Tamó tšabe soye endmëna. Pero chë tamó fténana tojtsóbemëse, ndoñe quešmátobena jamana cachiñe chabe tempsca sanana chaotsatsbomnama, ni saná jatamuama. Mo tšabe tamocá entšangbiama šmochtsemna, chéngbeñe jtsiyenëse ntšamo Bëngbe Bëtsá yobošcá, y nÿetscángafaftaca natjémbana šmochtsiyena ca” —cha tojánayana.

*Ndayá Jesús tojanabuataambá bouamnëngá tmo-jtsenëtšenama  
(Mt 19.1-12; Lc 16.18)*

<sup>1</sup> Chentšana, Jesús chë luarentšana tojéftsanbocna y tojána Judea luaroye y Jordán chenguana. Entsanga cachiñe chábioye tmojánabo, y cha chënga yojsabuátambaye, chë ntšamo jamana yojanamancá. <sup>2</sup> Báselta fariseunga chábioye tmojanobeconá, y jisháchichiyama mëntsá imojetsetjanaye: —¿Queojtselesenciana canë boyá chabe shémbioye cachcá jesonÿayama ca?

<sup>3</sup> Chora cha tojanëjua: —¿Ntšamo Moisés chë soyëngama tcmënjanamëndaye ca?

<sup>4</sup> Y chënga tmojánayana: —Moisés tojanalesenciá chë boyá chabe shémbioye chabuiyé canë tsbuanácha, ndayéchañe chaotsayana cha ya ndoñe chabe shema yontsemna ca, y chora cachcá chabe shema chabuesonÿá ca.

<sup>5</sup> Chora Jesús tojanëyana: —Tšëngta Bëngbe Bëtsabe mandëngä ainaniñe jójëngacñama ndoñe quešmátsboše causa, Moisés chca tšëngta Bëngbe tcmøjéftsanamëndá. <sup>6</sup> Pero quem luare jobojátšama orna, “Bëngbe Bëtsá canë boyabása y canë shembása tonjánabiam. <sup>7</sup> Chíyeca, chë boyabása chabe taitá y chabe mamá echanjésabashejuana, chabe shémaftaca jenútanama, <sup>8</sup> y chë útatna mo canÿacá bochántsemna.” Y chca, ya ndoñe útata quebochátsmëna, sinó nÿe mo canÿacá. <sup>9</sup> Chcasna, entšá ndoñe chaondéndbema ndayá Bëngbe Bëtsá mo canÿiñcá tojéftsema soye ca —cha tojánayana.

<sup>10</sup> Ya cach yebnoca imojsatsmëna ora, chabe uatsjéndayëngá cach soyama imojtétstjaye.

**11** Y Jesúś tojanéyana: “Nda chabe shémbioye cachcá tbojesonyá y ínÿaftaca tojtóbouamase, cha chë natsana shémbioye inÿe shembásuftaca jtseíngñayana; chana canÿe uabuatmá jtsebomnana. **12** Y chë shema chabe boyábioye cachcá tbojesonyá, y ínÿaftaca tojtóbouamase, chánaca chë natsana boyábioye ínÿaftaca jtseíngñayana; canÿe uabuatmá jtsebomnana ca” —Jesúś tojánayana.

*Jesúś, basetémëngbiama Bëngbe Bëtsábioye tbojan-impadá*

(Mt 19.13-15; Lc 18.15-17)

**13** Entšanga, basetémënga Jesúśbioye tmojanénatse, chauabájajuama y Bëngbe Bëtsábioye chëngbiama chaboimpadama; pero chabe uatsjéndayëngna tmojanontshé chë basetémënga unachayënga jtsécácanana. **14** Jesúś chca tojáninÿe ora, tbojánetna y chë uatsjéndayëngna tojanéyana: “Cachcá mónÿaye chë basetémënga átšbioye chamuabo y ndoñe matéuyanana; er Bëngbe Bëtsabe améndayana endmëna chë mo quem basetemëngcá imomnëngbiama. **15** Ndegombre cbéyana, nda Bëngbe Bëtsabe soyëngä ndoñe tonjóyëngacñe mo canÿe basetemcá jtsošbuáchiyëse, cha ndoñe queochatobenaye Bëngbe Bëtsabe améndayoye jamashënguama ca.”

**16** Y chë basetémënga tojanchebá, y chéngbeñe cucuatşëngä jajájuase, Bëngbe Bëtsábioye tbojanimpadá tšabe bendicionëngä chéngbeñe chaotsem-nama.

*Canÿe bomna entšá Jesúśbioye tojána*

(Mt 19.16-30; Lc 18.18-30)

**17** Jesú斯 jama tojtëtanontsé ora, canýe boyabása chábioye tojanótjajo, chabe shecuatšentse tojanoshéntsamentse, y mëntsá tbojantjá: —Tšabe Buatëmbayá, ¿ndayá šojtsemna jamana chë nÿetsca tescama yomna tšabe vida jtsebomnama ca?

**18** Y Jesú斯 tbojanjuá: —¿Ndáyeca “tšabia ca” šcjauyana? Tšabia nÿe canýa endmëna: Bëngbe Bëtsá. **19** Aca icotátshëmbo Bëngbe Bëtsá tojanmandacá: “Ndoñe catjóba, acbe shema ínÿaftaca ndoñe cattseíngñaye, ndoñe catjatbëba, ndoñe catjuaboínÿena, ínÿengbiyoje ndoñe catjáingñaye ndayánaca jabacama, y acbe bëtsëtsata ndoñe stëtsoye catjáquedaye ca.”

**20** Chora chë boyabása tbojanjuá: —Buatëmbayá, atše lempe chë mandënga básetema orscana sëndocumplina ca.

**21** Jesú斯 bonshanánaca tbojanonÿinÿé y mëntsá tbojaniyana: —Canýe soye cmontsebuáshbena jamana: Motsa, lempe ntšamo icobomncá cochjetsatobuiye, y chë crocénana, ndbomnëjémënga cochtsatšataye; chca, celoca canýe bëts bomnana cochántsebomna. Chentšana, cochjabo y šcochjuasto ca.

**22** Pero chë bobónstsbiyoje inÿetshá ibojsínÿnana Jesú斯 chca tbojaniyanama; y puerte ngménaca yo-jtá, cha puerte bomná inamna causa.

**23** Chora Jesú斯 cátoye tojanrrepará y chabe uatsjéndayënga tojanëyana: —¡Puerte totcá entsemna bomnëngbiama Bëngbe Bëtsabe amëndayoye ja-mashënguama ca!

**24** Chca imojouena ora, chë uatsjéndayënga ojnanánënga imojtsemna, pero Jesú斯 cachinë

tojanoyebuambá y mëntsá tojanéyana: —Atšbe bäsenga; ¡puerte totcá entsemna Bëngbe Bëtsabe amëndayoye jamashënguama! <sup>25</sup> Ndegombre, más paselo endmëna chë coshufjentša atëfnëjana canëe camello chauachnëngó, y ndoñe canëe bomná Bëngbe Bëtsabe amëndayoye jamashënguana ca.

<sup>26</sup> Pero chë uatsjéndayëngá nÿe más imojtsenjnanaye y imojtsentjanaye: —¿As, nda yochjobenaye atsbocaná jtsemnana ca?

<sup>27</sup> Chora Jesùs tojanënýanëe y tojanéyana: —Entsanga ndoñe quemátobena jamana canëa atsbocaná chaotsemnama, pero Bëngbe Bëtsá aíñe; er Bëngbe Bëtsá lemamá endobena ca.

<sup>28</sup> Chora Pedro tbojaniyana: —Aca contsonýá, bënga lempé chë fsëndbomna soyëngá fsënjjéseboshjona y ácaftaca fsëntsajna ca.

<sup>29</sup> As Jesùs tojánayana: —Ndegombre cbëyana, ndánaca átšbiyoje jasérviama y chë tsabe noticiëngá jábuayenama, tojéseboshjona chabe yebna, catšátanga o uabénanga, bebmá o befta, o bäsenga, o fshantsëngá, <sup>30</sup> cha mora quem luarentše echanjóyëngacñe chama patse soye más yebnëngá, catšátanga, uabénanga, bebmanga, bäsenga y fshantsëngá, masque puerte chaosufrima ínyëngá mochántsama; y chë inë luarocna, chë nÿetsca tescama yomna tsabe vida echanjónëngá. <sup>31</sup> Pero banga, mora uámanëngá imomnëngá, nduámanëngá mochántsemna; y banga, mora nduámanëngá imomnëngna, uámanëngá mochántsemna ca —Jesùs tojánayana.

*Jesús cacheñe tojánayana cha jóbanama y jtayenama  
(Mt 20.17-19; Lc 18.31-34)*

<sup>32</sup> Chentšana Jerusalenoye imojsaye, y Jesús yojtsebnatsana. Chë uatsjéndayëngä puerte ojnanánëngä imojtsemna, Jesús ndauatjcá choye yojtsayama; y inye becá entšanga ústonoye imojsajnëngna, imojsayáuatja. Jesús cacheñe chabe bnëtsana uta uatsjéndayëngä barie tojánachembo y tojanontsé jáuyanana ntšamo cháftaca jopásama yojtsemnana.

<sup>33</sup> Mëntsá tojanéyana: “Tšëngaftanga šmontsonyá, Jerusalenoye bënga mora montsajnama. Chocna, chë Bëngbe Bëtsá Entšá tbojanbemá, chë bachnangbe améndayëngä y ley abuátambayëngbe cucuatšiñe mochanjáboshjona, y chënga mochanjayana cha chaóbana ca; y ndoñe judiëngbe cucuatšiñe mochanjáboshjona. <sup>34</sup> Chënga mochantsáboyejuana, mochántsebuashëtotjo, mochántsetjanja y mochanjóba, pero chentšana unga tianoye cha echántayena ca.”

*Santiago y Juan, Jesús tmojanimpadá canye pavor cháuabiamama  
(Mt 20.20-28)*

<sup>35</sup> Chora, Santiago y Juan, Zebedeobe uaquiñata, Jesúsbioye tbojanobeconá y tmojaniyana: —Buatëmbayá, bëndata fséntseboše pavor chašcuabiamama ntšamo chacbojaimpadacá ca.

<sup>36</sup> Y Jesús tojanatjá: —¿Ndayá šojtseboše atše tséndatbiama chjamama ca?

<sup>37</sup> Y chata tbojaniyana: —Aca reycá chacojsémånda ora, cochjaleséncia bëndata fchayobená

jótbumana, canëa acbe catëbioica y inëa acbe uañicuayoica ca.

**38** As Jesùs tojanëjua: —Ntšamo šmontotjanañama tsëndata ndoñe quešnatstatšëmbo. ¿Ntšamo atše chaitsesufrincá, tsëndátnaca cachcá jasúfriama tašatjobenaye? ¿Y entšanga puerte bacá chacmojtsëbuatsená ora, tašochjauánta, ntšamo atše chjauantacá ca?

**39** Y chata tbojaniyana: —Aíñe fchanjobenaye ca.

Y Jesùs tojanëyana: —Ndegombre tsëndátnaca atscá šochanjasúfria, y atše causa cmochántsamma bëtsá soyëngama jasúfriana. **40** Pero atše ndoñe quetsátobena jamándana nda atše catëbioica y atše uañicuayoica chaótbemama. Chë útentše entsemna ndëmuanyëngbiama atše Taitá tojaprontacá ca.

**41** Chë inëe bnëtsana uatsjéndayënga chca tmojanuena ora, tmojanontsé Santiago y Juánoftaca jotjáyanana. **42** Pero Jesùs nÿetsca uatsjéndayënga tojánachembo y tojanëyana: “Tšëngäftanga šmondétatshëmbo, quem luarentsa amëndayënga lempe jtsemándayana, nÿa mo nduiñënga cuافتsemncá; y chë bëtsëtsa entšanga chëngbe obenánaca jtsemándayana, ntšámñaca jtsamëse, chë inëe entšanga sempre chamotsayaunana. **43** Pero tšëngäftangbeñe ndoñe chca chaondétsemna. Inÿetshá; masna, nda tšëngäftangbeñe chë más uamaná jtsemnama tojtseboše, cha bontsemna chë ínÿenga jtsaservénana; **44** y ndánaca tšëngäftanguentshá chë más uamaná jtsemnama tojtsebošá, bontsemna jtsemnana nÿetscangbiama, mo nÿe ínÿabiama

nÿets tempo oservenacá. <sup>45</sup> Cachcá, Bëngbe Bëtsá Entšá tbojanbemá ndoñe chenátabo cha chamotseservénama, ndayá ínÿenga jabáserviama. Y mo nda, ínÿenga játsebacama cuafjopagacá, cha echanjóbana ba entšanga atsebácanënga chamotsemnama ca” —cha tojánayana.

*Jesús canýe jtanábioye tbojanshná  
(Mt 20.29-34; Lc 18.35-43)*

<sup>46</sup> Chentšana, Jesús y chabe uatsjéndayënga Jericó uabaina puebloye tmojánashajna. Y Jesús chabe uatsjéndayëngaftaca y bëtscá entšángafaftaca Jericó pueblentsana yojtsaisebocana ora, Timeobe uaquiñá, Bartimeo ca uabainá, canýe jtaná lemošna otjanañá, benache juachañe yojtsetbemana. <sup>47</sup> Y Jesús Nazaretocá chéjana yojtsachnëjuanama cha yojátatshëmbona ora, tojanontshé mëntsá uayebuáchana: —¡Jesús, Davídbentšana Entšá, šmotselastemá ca!

<sup>48</sup> Chorna, banga ché jtaná imojsácacana iytëca chaóbemama. Pero cha más yojtsáyebuache: — ¡Davídbentšana Entšá, šmotselastemá ca!

<sup>49</sup> Chora Jesús tojantsá y ché ínÿenga tojanëyana: —Ché jtaná mochembo ca.

As ché jtaná tmojanchembo, y mëntsá tmojaniyana: —¡Añemo cochtsebomna; motsbaná! Jesús cmontsechembuana ca.

<sup>50</sup> Y ché jtaná, quefsaíya jtsenátsejquëse, yojontsënja y betsco Jesúsbioye yojobeconá. <sup>51</sup> Chora, Jesús ché jtanábioye tbojantjá: —¿Ndayá cojtseboše atše acbiama chjamama ca?

Y ché jtaná tbojanjuá: —¡Buatëmbayá, šmoleenciá atše chašuatabínÿnama ca!

<sup>52</sup> As Jesúś tbojaniyana: —Motsatoñe. Tsabá jtsatsmënama Bëngbe Bëtsábeñe icošbuachéyeca, tsabá contsatsmëna ca.

Y cachora cha tsabá ibojtabinÿna, y Jesúsbioye benachëjana ibojséstona.

## 11

### *Jesúś Jerusalenoye tojánashjango (Mt 21.1-11; Lc 19.28-40; Jn 12.12-19)*

<sup>1</sup> Ya Jerusalenoye imojtsebeconá ora, Betfagé y Betania pueblënga béconana, Olivos ca uabaina tjashe juachañe, Jesúś uta chabe uatsjéndayata tojanichamó, <sup>2</sup> y mëntsá tojanéyana: “Tsëndatbe natsana entsemna base pueblotémoye motsata. Chašojáshjango y cachora šochanjínÿena canÿe burrotema utsbuaná; chábeñe cabá ndocná tonjenojayé. Sochjuajafjoná y šochjuánatse.

<sup>3</sup> Nderado nda, ¿ndáyeca šmojtsanachá ca? chacmojátjase, šochjojuá: ‘Bëngbe Utabná bontsájaboto y chora bochantabáiseboshjona ca.’”

<sup>4</sup> As chata tbojána, y tbojáninÿena chë burrotema tsáshenañe, canÿe bëšáshañe utsbuaná, y imojua-jafjoná.

<sup>5</sup> Y básefta entšanga chiñe imojtsemnënga, chátbiyoje tmojanéyana: “¿Ndayá šoјtsama? ¿Ndáyeca chë burrotema šoјtsajafjná ca?”

<sup>6</sup> As chata tbojanjuá ntšamo Jesúś tojanéyancá; y chë entšanga tmojanalesenciá chë burrotema chamuánatsama. <sup>7</sup> Chentšana, chë burrotema Jesúsbioye tmojanánatse; chë burrotémbeñe chatbe entšayá tbojanájatse, y Jesúś chábeñe tojanenøjayé. <sup>8</sup> Bëtscá entšanga chëngbe entšayá chë

benachëjana imojsanëtëtsatsana, y ínÿengna chë jajoca imojuatëtsetše buacuashangá chiñe imojuacjaye. <sup>9</sup> Y chë natsana imojsajnënga y chë ústonoyënga mëntsá imojsaiúayebuache: “¡Bëngbe Bëtsá matschuanga! ¡Corente bendición bomná, chë Bëngbe Utabnabe obenánaca tojabá! <sup>10</sup> ¡T’sa tsabá chë echanjóshjangó améndayana, bëngbe bëts taitá David yojëftsemánda orcá! ¡Bëngbe Bëtsá celocá matschuanga ca!”

<sup>11</sup> Jesús Jerusalenoye tojánashjango, y Bëngbe Bëtsabe bëts yebnoye tojánamashëngó. Chabe shéconana lempe yojëftserrepárase, y ya yojtseibétatana causa, chabe bnëtsana uta uatsjéndayëngäftaca tojëftsanbocna, Betania puebloye.

*Jesús tojánayana canÿe betiye ndoñe más chaondëshájona ca  
(Mt 21.18-19)*

<sup>12</sup> Yëfsana, Betaniocana Jerusalenoye chënga imojtésajna ora, Jesús tbojánishëntsena. <sup>13</sup> Bënocana canÿe higo betiye yojinÿe; as tojána jontješiyama tainashajo o ndoñe. Pero nÿe tsbuánachënga chiñe yojínÿena, chora ndoñe shajo tempo bétsemna causa. <sup>14</sup> As Jesús chë higo betiyoye tojánayana: “¡Ndocna te más chacondëshájona entšanga chamosama ca!”

Y chabe uatsjéndayëngä imojuouena ntšamo cha tojanayancá.

*Jesús, Bëngbe Bëtsabe bëts yebnentšana enëngä y obuámnayëngä tojtanëbuacna  
(Mt 21.12-17; Lc 19.45-48; Jn 2.13-22)*

**15** Jerusalenoye tmojánashjajnentšana, Jesús Bëngbe Bëtsabe bëts yebnoye tojánamashëngo, y tojanontšé chentšana jtëbuacnana chë chentše imojsena y imojsobuámnañënga. Chéntsnaca imojtsemna entšanga canye crocénana enënga, y chë crocénana nÿe Bëngbe Bëtsabe bëts yebnentšama inoservena. Chë entšanga crocénana atrocayëngbe mesëshangá tojtsanenásatajchquëca, y chë palomatémënga enëngbe tßenëšéngnaca; **16** y ndoñe tonjanalesenciá ndocná Bëngbe Bëtsabe bëts yebnëjana chë soyënga chaotséchnëjuanama. **17** Y tojanontšé entšanga mëntsá jabuátambana: “Ndegombre, Bëngbe Bëtsabe uabemana palabrënguiñe cha mëntsá tojánayana: ‘Atšbe bëts yebna echantsabaina nÿetsca luarentša entšangbiama átseftaca encuéntaye yebna ca’; pero tšëngaftangna atbëbanëngbe oyeniñe chë yebna šmojtsebema ca” —Jesús tojanëyana.

**18** Chë bachnangbe más uámana amëndayëngä y chë ley abuátambayëngä tmojántatšëmbona ntšamo yojochnënguama; as tmojanontšé enójuabnayana ntšamo jobenayana cha jóbana, cha imojtsebiautatja causa, er nÿetsca entšanga imojsenjnayane ntšamo cha yojanabuátambama. **19** Pero yojtseibétatana ora, Jesús chabe uatsjéndayëngafaftaca chë bëts pueblentšana yojesóbocñe.

*Chë higo betiye tojtsanbuashá  
(Mt 21.20-22)*

**20** Yëfsana cachëse, cachëjana imojtésachnëjuana ora, tmojáninÿe chë higo betiye parejo tbëtëjëngaca yojtsebuashá. **21** Chora Pedro yojenójuaboye ntšamo yojopásama; as Jesúsbiyoje

tbojaniyana: —¡Buatëmbayá, minye; chë tconjayana ndocna te más tšabe betiye chaotsemnama betiye tojtsebuashá ca!

<sup>22</sup> Y Jesús tbojaniyana: —Bëngbe Bëtsábeñe šmochtsošbuáchiye. <sup>23</sup> Ndegombre cbéyana, nderado nda quem tjoye tojayana, “¡chentšana mojuaná y bëts uafjajónayoye motsëshbuetše ca!” y chca tojayana ainaniñe inyetsá juabna ntjatsbomncá, y ainaniñe puerte tojtsosbuaché ntšamo tojayancá aíñe yochjochnënguama, ndegombre chca echanjochnëngó. <sup>24</sup> Chiyeca chochanjáuyana, lempe ntšamo Bëngbe Bëtsáftaca chašmojtsencuénta ora chašmojtsotjanañama, ainaniñe corente šmochtsejuabnaye ya šmojóyëngacñe ca, y ndegombre chca šmochántsebomna. <sup>25</sup> Y Bëngbe Bëtsáftaca chašmojtsencuénta ora, šmochjenójuaboye nderado nda ndaye bacna soye tšëngaftangbiama tojamama, y cháftaca cabá etonánëngä šmojtseminiëse, šmochtseperdóna; chca, Bëngbe Bëtsá, celoca endméná, tšëngaftangbe bacna soyëngama chacmotsaperdonama. <sup>26</sup> Pero inyá ndoñe šmonjaperdonasna, Bëngbe Taitá, celoca endméná, cach ndoñe tšëngaftanga quecmochátaperdonaye ca —cha tojánayana.

*Jesusbe obenana  
(Mt 21.23-27; Lc 20.1-8)*

<sup>27</sup> Chca tojanopasá chentšana, Jerusalenoye chënga tmojesaná. Jesús Bëngbe Bëtsabe bëts yebnëjana yojsobuertanëntscuana, chábioye tmojanobeconá bachnangbe amëndayëngä, ley abuátambayëngä y chë judiéngbeñe bëtsëjemëngcá

amëndayënga, <sup>28</sup> y mëntsá tmojantjá: —¿Ndaye deréchoca chë contsama soyënga aca cojtsama ca? Chca jtsamama nda obenana tcmenjatsetá ca?

<sup>29</sup> As Jesú斯 tojanéyana: —Atsnaca sëntsebomna canye soye tshëngtaftanga jatjayama. Chašmojuase, átsnaca cbochjáuyana ndaye deréchoca atše chca stsama. <sup>30</sup> ¿Nda Juan chë Ubayaná tbojanichmó entshanga jubáyama, Bëngbe Bëtsá o entshanga? Smëyana ca.

<sup>31</sup> Chora chënga tmojanontsé mëntsá enatsëtsnayana: “Bëngbe Bëtsá ca’ chamojojuase, cha šochanjáuyana: ‘As ñdáyeca chë cha tcmojanabuayená soyënguiñe ndoñe šmonjanošbuaché ca?’ <sup>32</sup> Pero ndoñe quemuátobena jayanana ‘entshanga ca.’” Chca tmojánayana, er chënga entshangbiama imojánauatja, er nÿetscanga imojanjuabná, Juan ndegombre Bëngbe Bëtsabe juabna oyebuambnayá yojamnama. <sup>33</sup> Chcasna, chënga tmojanjuá: —Bëngä ndoñe queftsátstatshëmbo ca.

Y Jesú斯 tojanéyana: —As atše cach ndoñe quecbochatéyana ndaye deréchoca atše chca stsama ca.

## 12

### *Chë puerte bacna trabájayëngbiama cuento (Mt 21.33-46; Lc 20.9-19)*

<sup>1</sup> Chora Jesú斯 tojanontsé cuentëngaca jabuátambana. Mëntsá tojanéyana: “Canye entshanga bëtscá uvas betiyënga yojáje, y chë shëconana yojajétja. Chë uvasëshangá juantshëtjamna canye base luare yojajutjo; y canye tsbanana jebna soye yojapórma chiñe jtsashanýama. Chentshana, inye

trabájayëngä chë jajañe yojúyentšame, y chana inÿe luaroye yojtsoñe. <sup>2</sup> Chë uvasëšangá juashacama tempo yojbuache orna, chë jajañe nduiñö canÿe oservená ibojíchmua chë arréndayëngä jáuyanama ntsachetšá chë nduiñö ibojsotocánama. <sup>3</sup> Pero chëngna, cha imojishache, imojtsejantšetaye, y tondaye ntajatacá imojtichmuá. <sup>4</sup> Chentšana, chë nduiñö inÿe oservená ibojíchmua; pero chana, bestsaše imojselísia y podesca imojsóyenguango. <sup>5</sup> Chentšana inÿa ibojatichmuá, y chana chë arréndayëngä imojsóba. Y bángnaca yojichamuá; pero chëngna, inÿengna imojsajantšetaye y inÿengna imojsëbaye.

<sup>6</sup> “Chë nduiñö cabá canÿa ibojsábojamna jíchmuama: cachabe bonshana uaquiñá. Cabana, cha ibojíchmua y mëntsá yojtsejuabnaye: ‘Atšbe uaquiñá cocayé mochanjóyeunaye ca.’ <sup>7</sup> Pero chë arréndayëngä cha imojinÿe ora, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbanga, y lempe chabe otocana soyënga bëngbiama echanjoquéda ca.’ <sup>8</sup> Chcasna, cha imojishache, imojsóba y chë uvas betiyëngä jajañentšana más chcoye imojetsëtšena ca” — Jesús tojancuentá.

<sup>9</sup> Jesús chca jacuéntama tojanpochocá ora, tojánayana: “Y asna, ¿ndayá chë fshantse nduiñö yochjama ca? Cha co echanjá y chë trabájayëngä echanjetsëbaye, y inÿe trabájayëngä chë uvas betiyëngä jajañe echanjárendaye.

<sup>10</sup> “¿Tëngtañga ndocna te Bëngbe Bëtsabe uabemana palabra šmëndualía? Chiñe mëntsá en-

dayana:

Chë yebna jebuanëngä tmojtsanaboté ndëtšbë, mora chë más bëts uashacuanësentše entsejájona.

**11** Chë soye Bëngbe Utabná, Bëngbe Bëtsá chca tojama, y bëngä chama ojnanánëngä fséntsemna ca.”

**12** Chora, chë bachnangbe amëndayëngä y chë bëtsëjemëngcá mändayëngä tmojanbošena Jesús jishachana, er chënga tmojanenótatshëmbona cha chca tojancuentá jinÿanÿiyama chënga mo chë puerte bacna trabajayëngcá imojanmënama. Pero entšangbiama imojsauatja, chíyeca cachcá tmojanonýá y chentšana imojsóñenga.

*Chë Romoca bëts mandadbiamma impuesto jtsatsquécjnayama*

(Mt 22.15-22; Lc 20.20-26)

**13** Chentšana chënga, básefta fariseunga y Heródesbe ústonëngä Jesúsbiye tmojanichamó, ndayá cha tojayaniñe jisháchichiyama, as chca jtsebomnama ndaye sóyeca mandadëngbeñe cha mal jaquédana. **14** Chënga tmojána y Jesús tmojaniyana: —Buatëmbayá, bëngä fsëndëtatshëmba aca ndegombre soyëngä cnetsabuátambama, y ndoñe jatuenanana nÿe ntšamo entšanga tmojatichamcá, er acbiama tondaye quenatámana nda más uamaná o nduamaná tomnana; y contsabuataambá ndegombre tšabe vida jtsebomnama, ntšamo Bëngbe Bëtsá yomandacá. Chcasna, ¿tšabá tanántsemana, César, chë Romoca bëts mandadbiamma bëngä impuesto jtsatsquécjnayana? ¿Fchatsatsquécjnaye o ndoñe ca? —chënga tmojantjá.

**15** Jesús yojtsetátšëmbo, chënga bacna entšanga ntšamo ndegombre tmojuabnacá ndinýinýnayëngä imojamnama; chíyeca tojanéyana: —¿Ndáyeca tšëngäftanga šmojtseboše chë sóyeca atše jisháchichiyama? Canye denario crocénana šmiyëboñe, atše chayobená jinýama ca.

**16** As canye crocénana tmojanoyé y Jesús tojanéyana: —¿Ndabe jubiá quem crocenániñe yojtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubiá; cha chca enduabaina ca.

**17** Chora Jesús tojanéyana: —Chcasna, César šmochtoyiye cha ibotocana soye; y Bëngbe Bëtsana cha ibotocana soye ca.

Y nÿetscanga chama imojenjnaná.

*Obanëngä jtayenama Jesús tmojantjá  
(Mt 22.23-33; Lc 20.27-40)*

**18** Chentšana, báseftanga saduceo ca uabaina entšanga tmojána Jesús jinýama. Chënga imojanjuabná obanëngä ndocna te ntayenana ca. Chíyeca, Jesús mëntšá tmojaniyana:

**19** —Buatëmbayá, Moisés tojëftsanabema, nderado canye boyá tojóbana y bäsenga ndoñe tonjëftsabáshejuanësna, canmëna chë uabentsá chë shémaftaca jtobouamayana, chca, chabe uabochená obanabiama bäsenga jtsabamnama ca.

**20** Y chcase, canye, canýsëfta catšátanga monjamna. Chë natsaná tonjanobouamá y tontsanóbana bäsenga ntjëftsabashejuancá.

**21** Chentšana, chë ústoná uabentsá chë shémaftaca tonjanobouamá, pero chana tontsanóbana,

básenga ntjéftsabashejuancá; chë inÿe uabentsáftaca cachcá tonjanopasá. <sup>22</sup> Chca, nÿetsca canÿsëfta catšátangaftaca cha tonjanobouamá, pero ndocná básenga ntjéftsabáshejuanana. Y chentshana chë shembásanaca tontsanóbana. <sup>23</sup> Y morna, chë obanënga chamojtayena ora, ¿ndabe chë canÿsëfta catšatanguentshabe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

<sup>24</sup> As Jesús tojanéyana: —Ntšamo Bëngbe Bëtsabe uabemana palabrënguiñe endayancá ndoñe tcmonjosertá, ni Bëngbe Bëtsabe obenanama. Chíyeca ntšamo ndoñe yondmëncá šmontsichamo. <sup>25</sup> Er obanënga chamojtayena ora, ni boyabásenga ni shembásenga quemochatóbouamnaye, y chca, chënga mochántsemna mo celoca angelotemëngcá. <sup>26</sup> Y chë obanënga jtayenama, ¿Moisesbe librëshañe ndoñe šmëndualía ntšamo Bëngbe Bëtsá tbojaniyanama, chë betiyetema yojtsángbototjuana ora? Bëngbe Bëtsá mëntšá tbojaniyana: “Atše sëndmëna Abraham, Isaac y Jacobëbe Bëtsá ca.” <sup>27</sup> Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entšangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena. Tšëngaftanga canÿe ndoñe ndegombre soyiñe šmontsemna ca —tojanéyana.

*Chë más bëts uámana mando  
(Mt 22.34-40)*

<sup>28</sup> Chentše yojtsemna canÿe ley abuatambayá. Cha yojouena ntšamo Jesús y chënga imojtse-natsëtsnayana, y yojtsetátshëmbo Jesús tšabá to-

janéjuama. As, tojanobeconá y Jesúsbiye tbojan-tjá: —¿Ndayá chë más bëts uámana mando yomna ca?

<sup>29</sup> Y Jesús tbojanjuá: —Chë más uámana mando mëntsá endmëna: “Israeloquënga šmochjouena, Utabná, Bëngbe Bëtsá endmëna, y nÿe canÿe Bëngbe Utabná endmëna, ndocná más. <sup>30</sup> Utabná Bëngbe Bëtsá cochtsebobonshana nÿets acbe ainánaca, nÿets espíritoca, nÿets juábnaca y nÿets añémoca.”

<sup>31</sup> Y chentšana quem inÿe mändnaca: “Ndëmu entšánaca cochtsebobonshana, ntšamo cach aca cuenobobonshancá.” Ndocna mando quem uta mandama más quenatámana ca —Jesús tojánayana.

<sup>32</sup> Chora, chë ley abuatambayá Jesúsbiye tbojaniyana: —Buatëmbayá, puerte tšabá tcjayana. Ndegombre yomncá contsichamo, nÿe canÿe Utabná endmëna y ndocná más. <sup>33</sup> Y cha jtsebobonshánana nÿets ainánaca, juábnaca y añémoca, y ndëmu entšánaca jtsebobonshánana cachá cuenobobonshancá, puerte cuámana. Cach nÿetšá ndoñe quenatámana bayënga jtsébánayana, ni chë uátsëmbona soyënga Bëngbe Bëtsá jëtschuayama ca.

<sup>34</sup> Cha nÿets juábnaca tbojanjuama Jesús tojáninÿe ora, tbojaniyana: —Batšatema cmontsebuáshbena jtseprontánama, Bëngbe Bëtsá chacolesenciamá acbe ainanentše jtsemándayama ca.

Y chentšana, ya ndocná yonjenñémua Jesús más jatstjanayama.

*¿Cristo ndabe entšábentšana yomna?  
(Mt 22.41-46; Lc 20.41-44)*

**35** Jesú斯 Bëngbe Bëtsabe bëts yebnentše yojtsabuátambaye ora, tojánayana: “¿Ndáyeca chë ley abuátambayëngä mondbétsichamo chë Uámana Uabuayaná Davídbentšana iuabó ca? **36** Cach David, chë Uámana Espíritbe mändoca mëntšá tojánayana:

Bëngbe Bëtsá, atšbe Utabná Crístbiye tbonjaniyana:

atšbe catšbioica mótbema,

atšbe obenánaca, acbe uayayëngä acbe cucuatšiñe chamoquedama chjamëntscuana ca.

**37** ¿Ntšámose Cristo Davídbentšana Entšá nántsemna, cach David ‘Utabná ca’ chábiye tbojtsabobuátmëse ca?” —cha tojanëyana.

Y chë bëtscá entšanga, oyejuayëngä imojsue-nana.

*Jesú斯 chë ley abuátambayëngbiama tojánayana, chënga ndoñe tšabá montsama ca*

(Mt 23.1-36; Lc 11.37-54; 20.45-47)

**38** Mëntšánaca Jesú斯 chënga yojtsabuátambaye: “Cuedado šmochtsebomna y ndoñe šmattsama chë ley abuatambayëngcá. Chënga jtsogusetánana bënëna entšayangaca jtsajnana y jtsebošana tsáshenañe entšanga nÿa respétoca chamotsacheuanama. **39** Chë judiëngbe enefjuana yebnënguenache, chë más uámana luarënguiñe jtsetbiámanana, y chë fiestënguenache nÿa quëfseroca. **40** Pero chënga, viudángbiye chë tmobomna soyëngä jtsabacayana, y entšangbe delante tšabá chamotsénÿama, y chéngbiye imojsaíngñama ndoñe chaondëtsótatšëmbuamna, Bëngbe Bëtsáftaca tša jtsencuéntayana. Chë

causa, Bëngbe Bëtsá ínÿengbiama más chënga echanjácastigaye ca” —Jesús tojánayana.

*Jesús yojtsénÿaye chë crocénana quëcjnayënga  
(Lc 21.1-4)*

<sup>41</sup> Jesúus jabuátambama tojanpochocá ora, tojanótbema Bëngbe Bëtsabe bëts yebnentše, chë crocénana quëcjnayétema ndirichiñe; y chë crocénana quëcjnayënga yojtsénÿaye. Bëtscá bomnëngna becá crocénana imojtsequëcjnaye.

<sup>42</sup> Chora, canÿe viudá ndbomnëjémnaca yojobeconá y nÿe uta crocénana chëtémiñe yojafsesegóra. <sup>43</sup> Chora Jesúus chabe uatsjéndayënga tojánachembo chamobéconama, y mëntsá tojanéyana: “Ndegombre cbéyana, quem viudá ndbomnëjema, Bëngbe Bëtsabíama nÿetscangbiama más tonjéftsesegorá.

<sup>44</sup> Chë bomnëngna chë yojtsóyentsjamentšana tmonjéftsesegorá, y cabá bomnana imotsóbomñe; y chë viudana tonjéftsesegorá lempe ntsachetšá yobomncá; masque tša ndbomnëjema, chë vida jtsebomnama lempe ntsachetšá yobomncá tonjéftsesegorá ca.”

## 13

*Jesús tojánayana chë Bëngbe Bëtsabe bëts yebna lempe mochjánpochocama  
(Mt 24.1-2; Lc 21.5-6)*

<sup>1</sup> Jesúus Bëngbe Bëtsabe bëts yebnentšana tojéftsanbocna ora, canÿe chabe uatsjendayá tbojaniyana: —Buatëmbayá, minÿe, ¡tša bëts ndëtsbenga, y tša botamana bëts yebnëngá ca!

<sup>2</sup> Chora Jesús tbojaniyana: —Tšabá cochjinÿe tša botamana bëts yebnënga. Pero muentše ndoñe queochaisoquéda ni mo canÿe ndétshé inÿebé jatusboy. Lempe mochantsepochóca ca.

*Ntšamo yochtsemna quem luare jopochócama te chaojtsobeco ora*

(Mt 24.3-28; Lc 21.7-24; 17.22-24)

<sup>3</sup> Chentsana, Olivos tjashoye chënga tmojána. Bëngbe Bëtsabe bëts yebnentša ndirichiñe yojamna; y Jesús tojanótbema ora, Pedro, Santiago, Juan y Andrés iytécana tmojantjá, <sup>4</sup> ntšamo cha tojanayancá ntseco yochjanopásama, y chca jopásama ya tojtsobecuama entšanga chamotsetatšëmbuama, ndayá Bëngbe Bëtsá yochjanma ca.

<sup>5</sup> Chora Jesús tojanéjua: “Cuedado šmochtsebomna ndocná chacmondáingñema.

<sup>6</sup> Banga mochanjabo y mochantsabichamo chënga Jesús imomna ca. Mochántsichamo: ‘Atše chë Cristo sëndmëna ca’, y chca, ba entšanga mochanjáingñaye.

<sup>7</sup> “Entšanga tmojtsentsjanama y nderado mochjentsjámnaca tšëngtaftanga chašmojouena ora, ndoñe šmattsauatja; er chca chaochnënguama entsemna, pero masque chca, chora chë quem luare jopochócama tempo cabá ndoñe queochátmëna. <sup>8</sup> Canÿe luarentša entšanga inÿe luaroca entšángtaftaca mochántsentsjanaye, y canÿe amëndayábentša entšanga inÿe amëndayábioca entšangaftácnaca; ba luarënguenache fshantse echanjuangmëmana y bëts shëntsana

echanjóshjango. Masque chca jasúfriase, más chcoye cabá más mochanjatssúfria.

**9** “Pero tšëngtaftangna cach tšëngtaftangbiama šmochtsantješna; entšanga cmochanjíshëche y améndayëngbe cucuatšiñe cmochanjábashejuana, judiëngbe enefjuana yebnënguenache cmochanjátsetšenaye. Atšbe ústonënga bétsemna causa, mandadëngbioye y reyëngbioye cmochanjunatse, choa, chëngbe delante ntšamo atšbiama šmotatšëmbcá chašmuayanama.

**10** Er entseyta, quem luare cabá ndopochóca ora, Bëngbe Bëtsabe tšabe noticiëngä nÿetsca luarënguentša entšángbioye chaóshjanguama.

**11** Y ínyengbe cucuatšiñe jabáshejuanama chacmojtsénachá ora, ndoñe šmattsenócochinýena ntšamo chora šmochjayana. Chora šmochjayana ntšamo Bëngbe Bëtsá yochjamcá tšëngtaftanga chašmuayanama, er tšëngtaftanga cánëngä ndoñe chora quešmochátoyebuambnaye, ndayá chë Uámana Espíritu tšëngtaftangbiajana echantsóyebuambnaye.

**12** “Canëe catšata cachabe catšata ínyengbe cucuatšiñe bochanjáboshjona chamotsóbama, y bëtsëtsanga cachëngbe bäsenga mochanjábashejuana chamotsëbáyama; y chë bäsengna chëngbe bëtsëtsangbe contra mochántsemna y chamotsëbáyama mochanjábashejuana. **13** Atšbe ústonënga bétsemna causa, nÿetsca luarënguentša entšanga cmochantsëbuayënenja; pero nda nÿets tempo átšbeñe ošbuachiyá totsomñe, atsbocaná echántsemna.

**14** “Chë Bëngbe Bëtsabe juabna oyebuambnayá Daniel, chë puerte uabouana soye quem luare jopochócama tojéftsanabema. Chë puerte uabouana soye, chca jtsemnama ínyoca tšëngaftanga chašmojinýe ora (nda tojtsalía, chabosertá), šmochántsetatsëmbo chë puerte ngménana tempo tojóshjanguama; chorna, chë Judeoca chamojtsemna entšanga, batsjabengoye chamotsacheta; **15** chama, nda cachabe yebnentša tsbanánoca chaojtsemna, chocana ndoñe chaondétastjango, ni chaondétamashëngo tsoicana ndayá jesábocnama; **16** y nda jajoca chaojtsemna, yebnoye ndoñe chaondéta ni mo chabe quëfsaíya jesácñama. **17** ¡Tša lastema chë tempo ngomámanëngä o ochóchaye šešonga chamojtsabamna shembásengbiama! **18** Bëngbe Bëtsá šmochtseimpadana chë ngménana tempo ndoñe chaondóshjango uaftena tempo ora, **19** er chora puerte ngmenancá echántsemna. Tša jabuache ngmenancá, quem luare jobojátšama orscana y ménstscoñama y más chcoye, cachcá ngménana ndoñe ntjamnana. **20** Chë puerte ngménana tempo, yapa bën ndoñe chaondétsemnama Bëngbe Bëtsá ndoñe tonjalesenciase, ndocná quentatsbocá; pero cha, chabe ubuáyanëngä, chabe bocacánëngä corente endábabuanýeshanayeca, echanjama yapa bën tempo ndoñe chaondétsemnama.

**21** “Chora nderado nda chacmojáuyana: ‘Minýe, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana. **22** Er mochanjábocana ndoñe

ndegombre uámana ubuáyanëngä, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëts soyëngä chëngbe obenana jinÿanÿiyama, entšanga jáingñama, y tmojobenase, chë Bëngbe Bëtsabe bocacánëngnaca.  
<sup>23</sup> ¡Cuedado šmochtsebomna! Cabá chca ndochnëngó ora, lempe tcbonjabuayená ca” — Jesús tojanëyana.

*Bëngbe Bëtsá Entšá tbojanbemá quem luaroye echanjésabo*  
<sup>(Mt 24.29-44; Lc 21.25-36)</sup>

<sup>24</sup> Mëntšánaca Jesús tojanëyana: “Pero chë tempo, entšanga puerte chamojasufrí chentšana, shinÿe ndoñe queochátsbuashinÿinÿana, júashconá ndoñe queochátsbinÿnaye, <sup>25</sup> celocana estrellëngä echanjatquécjana, y quem luarentša tsbanánoca espíritëngä obenana bomnëngä echanjángmëmana.  
<sup>26</sup> Y chora, entšanga mochanjinÿe, Bëngbe Bëtsá Entšá tbojanbemá jantsetëshiñe echántsaboye, corente obenánaca y corente buashinÿinÿaniñe.  
<sup>27</sup> Chora cha chabe angelëngä echanjámëndaye chë Bëngbe Bëtsabe ubuáyanëngä júbuajama, nÿets luarëngocana, quem fshantsoca cánÿoica juachoicana, celoca ínÿoica juachónstscoñie.

<sup>28</sup> “Chë higo betiyama šmochjuatsjinÿe: Tsëm buacuafjëngä tojtsebomna ora y tojtsaisëjotsana, jtsotatšëmbuana chë tšabe tempo ya tojtsaisobecuama. <sup>29</sup> Cachcá, chë soyëngä ndayama tšëngtaftanga tcbonjauyancá chašmojinÿe ora, šmochántsetatšëmbo Bëngbe Bëtsá Entšá tbojanbemá ya jésabama

yojtsemnama. <sup>30</sup> Ndegombre cbéyana, lempe chca echanjochnëngó, morsca entšanga cabá ndóbana ora. <sup>31</sup> Celoca y quem luare echanjopochóca, pero atšbe palabra ndocna te queochaisopochóca.

<sup>32</sup> “Pero Bëngbe Bëtsá Entšá tbojanbemá ndayté y ntseco ora yochjésabama, ndocná quenátstatšëmbo, ni chë celoca angelënga, ni Bëngbe Bëtsabe Uaquiñá. Nÿe chë Taitá chama yotátsëmbo.

<sup>33</sup> “Chíyeca, cuedado šmochtsebomna y yejuana šmochtsantješna, er ndoñe quešmátstatšëmbo mocna ora yochtsemna Bëngbe Bëtsá Entšá tbojanbemá jésabama tempo. <sup>34</sup> Echántsemna mo canÿe entšacá; chana inÿe luaroye ya jëftsebocnama ora, chabe oservénënga jëftsamëndana chabe yebna chamotsinÿenama. Cada ona canÿe trabajo jëftsebónÿiyana, y chë shanÿá jëftsemándana botamana chaotsantješnama. <sup>35</sup> Chcasna, cuedado šmochtsebomna, šmochtsantješna, er ntšamo chë trabajayëngcá chë yebna nduiñio ntseco jtashjanguama, ndoñe ntsetatšëmbuana, mo nderado jétatana, tséntseto ora, bínÿanoye o cachëse, tšëngافتanga cachcá, Bëngbe Bëtsá Entšá tbojanbemá ntseco jésabama ndoñe quešmátstatšëmbo; <sup>36</sup> ndoñe cuedado šmontsebomnëse, nderado cha nÿe ndeolpe nántashjangó, tšëngافتanga ndëprontránënga šmojtsemna ora, mo ftsomañe cuenta. <sup>37</sup> Chíyeca, ntšamo tšëngافتanga chochanjauyancá, nÿetscanga chanjáuyana: ¡Puerte cuedado šmochtsebomna ca!” —Jesús tojánayana.

**14**

*Entšanga imojtsejuabnaye ntšamo jamëse Jesús jishachama*

(Mt 26.1-5; Lc 22.1-2; Jn 11.45-53)

<sup>1</sup> Bashco fiestama uta te yojetsájamna, chë Bëngbe Bëtsá Egíptocana judièngbe bëts taitanga tojánatsebacama jtenójuaboyama fiesta, chë levadúraca ndépormana tandëše sayora. Chë judièngbe bachnangbe améndayëngä y chë ley abuátambayëngä imojsenguaye ntšamo Jesús jishachana jtseíngñase, y jtsóbama.  
<sup>2</sup> Báseftanga imojsichamo: “Quem fiesténtscuana ndoñe, er nderado entšanga yapa muanjóntsha enbouenanana ca.”

*Canýe shembása botamana uanguëtše békaye Jesusbe bestšašiñe tbojanbueščja*

(Mt 26.6-13; Jn 12.1-8)

<sup>3</sup> Jesús Betanioca yojtsemna, Simón chë bacna nguayanánaca šocá ca uabobuatmabe yebnentše; meséshentše Jesús yojtsemna ora, canýe shembása tojánashjang. Chë shembása yojúshjang canýe alabastro jarrétema jútjena canýe becá uámana y botamana uanguëtše békayeca, ena nardana uanguëtsiye; chana chë jarrétema yojátsba y chë békaye Jesusbe bestšašiñe tbojanbueščja. <sup>4</sup> Chca tmojáninye ora, báseftanga chentše imojtsemnëngä tmojanotjayaná y mëntsá imojtsenatsëtsnaye: —¿Ndáyeca nÿe bonamente chë soye yojtsemna ca? <sup>5</sup> Chamna, matmënjobenanga chë békaye unga patse denario crocenánama juiyana, y chánaca ndbomnëjémëngä matmënjugabuache ca.

Y chë shembásabiamma podesca imojsichamo.

<sup>6</sup> Chora Jesús tojanéyana: —¿Ndáyeca quem shembása ndoñe cachcá šmochanjonýaya ca? ¡Ndocá matatsana! Atšbiama tšabe soye tonjama. <sup>7</sup> Er ndbomnémémenga nýets tempo tšéngtaftangbeñe mochanjéftsemna, ndayténaca šmojábošena ora, šmatjobenaye tšabe soye chéngbiama jamana; er atše tšéngtaftangaftaca ndoñe nýets tempo quicháisemna. <sup>8</sup> Quem shembása lempe ntšamo tojobenacá atšbiama tonjama. Chca tonjama ora, atšbe cuerpo tonjaprontá atše juatbontsa tescama, cabá ndoñe obaná séntsemna ora. <sup>9</sup> Ndegombre cbéyana, quem luaroca ndayéntsnaca Béngbe Bétsabe tšabe noticiénga chamojtsabuayiyná chentše, ntšamo quem shembása tojamámnaca becá mochanjéftsóyebuambaye, chca, entšanga chabiama chamotsenójuabnama ca —cha tojanéyana.

*Judas tojána bachnangbe améndayéngbiyoje, Jesús  
chamuishachama  
(Mt 26.14-16; Lc 22.3-6)*

<sup>10</sup> Chentšana, Judas Iscariote, canye chë bnétsana uta uatsjendayénguentšá, tojána chë bachnangbe améndayéngtaftaca jencuéntama, Jesús chéngbe cucuatšiñe jaboshjonama. <sup>11</sup> Chca tmojanuena ora, chénga imojóyejuaye y tmojanšbuachená crocénana jtabuénayana. Y cach orscana Judas yojsenguaye ntšamo jamana y ndémua ora, Jesús chéngbe cucuatšiñe jaboshjonana.

*Jesús chabe uatsjéndayëngaftaca Bashco saná tojanse*

(Mt 26.17-29; Lc 22.7-23; Jn 13.21-30; 1 Co 11.23-26)

<sup>12</sup> Chë Bashco fiesta bojatšenté, chë levadúraca ndëpormana tandëse sayté, chë uatsjéndayëngä Jesús tmojantjá: —¿Ndémoca cojtseboše bënga fchaiprontama, Bashco saná chacosama ca?

Chca te chë judiëngä imojanamana, Bëngbe Bëtsá jëtschuayamna canëye oveshá jóvana chora jasama, chë Egiptocana chëngbe bëts taitanga Bëngbe Bëtsá tojánatsebacama jtenójuaboyama.

<sup>13</sup> As Jesús uta chabe uatsjéndayata tojanichamó y mëntsá tojanëyana: —Chë bëts puebloye motsata. Chašojáshjangó ora, canëye bacó cmochanjóbiatše, matbajíñe búyeshe echantsabuyambaye; cha šochjuasto y šochtserreparana ndëmuanëye yebnentše yochjámashënguama; <sup>14</sup> y chë yebna nduiño šochjauyana: “Buatëmbayá tonjayana: ¿Ndayentše chë tsañe yojtsemna, Bashco saná atše atšbe uatsjéndayëngaftaca jasama ca?” <sup>15</sup> As cha cmochanjínÿanÿiye canëye bëts tsañe, tsbanana pisoca, lempe prontániñe; chentše šochjapróna bënga mochjasama ca.

<sup>16</sup> As chë uatsjéndayata tbojána y tbojáninÿena lempe ntšamo Jesús tojanëyancá; y chentše chë Bashco saná tbojanprontata.

<sup>17</sup> Tojanibétata ora, Jesús chë yebnoca tojánashjangó, chabe bnëtsana uta uatsjéndayëngaftaca. <sup>18</sup> Y meséshentše imojtsesaye ora, Jesús tojanëyana: —Ndegombre cbéyana,

canýa tšëngtaftanguentšá, átšeftaca entsesá cha, uayayëngbe cucuatšiñé šochanjáboshjona ca.

**19** Chorna chë uatsjéndayëngä ngménaca imojtsemna, y tmojanontšé canýánä cha jatjayana: — ¿Atše chtsemna ca?

**20** Y Jesúś tojanéjua: —Canýa chë bnëtsana utatentšá entsemna. Chabe tandëše cach atše sëntsefchecuacná šcnenentše cha entsefchecuacná. **21** Ndegombre, Bëngbe Bëtsá Entšá tbojanbemáftaca echanjopásä ntšamo chabiama Bëngbe Bëtsabe uabemana palabrënguiñe endayancá. Pero, ¡tša lastema chë bochjáboshjonabiam! Chabiama más tsabá manjamna ndoñe ntjónynana ca —Jesúś tojánayana.

**22** Imojtsesantscuana, tandëše tojanca, Bëngbe Bëtsábioye chama tbojtanchuá, tojanjataye y chabe uatsjéndayëngä tojanéjatá, y mëntsá tojánayana: “Mocñëngä, mosëngä, atšbe cuerpo entsemna ca.”

**23** Chentšana, canýe coptema vínoyeca tojanaca, Bëngbe Bëtsábioye tbojtanchuá, chabe uatsjéndayëngä tojanëfsašé, y nÿetscanga tmojanofšé. **24** Mëntsá tojánayana: “Quem vínoye atšbe buiñe entsemna. Atšbe buiñe echanjuábuashana entšanga chamotsetatšëmbuama ntšamo Bëngbe Bëtsá entšanga tojašebuachenacá ndegombre yochjochnënguama. Chë buiñe bëtscá entšangbe tsabíama echanjuábuashana. **25** Y ndegombre cbéyana, morscana ya ndoñe más chë uvasësentšana obocniye quichaisofšiye. Chë tsém vínoye tšëngtaftangaftaca chanjofšiye, Bëngbe

Bëtsabe amëndayoca chamojtsemna ora ca” — tojánayana.

*Jesús tojánayana, chábioye ndoñe bonjanabuátma  
ca Pedro yochjánayanama  
(Mt 26.30-35; Lc 22.31-34; Jn 13.36-38)*

**26** Bëngbe Bëtsábioye jëtschuayama tmojancantá chentšana, Olivos tjashoye tmojéftsanbocana.

**27** Jesúz tojanéyana: —Nÿetsca tsëngaftanga quem ibeta átšeñe ošbuáchiyana šmochantsobuetše y šmochántsacheta, er Bëngbe Bëtsabe uabemana palabrënguiñe, cha mëntšá tojánayana: “Chë oveshënga abuajénja chanjóba y chë oveshënga mochantsáshana ca.” Chca tsëngaftangtaftaca echanjopásá, uayayënga chašmojishache ora.

**28** Pero obanënguentšana chaitayenentšana, tsëngaftangbe natsana Galileoye chanjá ca —cha tojanéyana.

**29** Chora Pedro tbojaniyana: —Masque nÿetscanga ácbeñe ošbuáchiyana chamotsobuetše y chamotsacheta, atše nÿa ndocna te ca.

**30** Chora Jesúz tbojaniyana: —Ndegombre cbeyana, cam ibeta, ngallo cabá uta soye ndécánta ora, aca unga soye cochanjayana ndoñe šconduabuatzma ca.

**31** Pero Pedro más yojsichamo: —Masque chašotsemna ácaftaca jóbanama, atše ndoñe quichátayana ndoñe cbondubuatma ca.

Y nÿetscanga cachcá imojsichamo.

*Getsemaní luarentše Jesúz, Bëngbe Bëtsáftaca tbojanencuentá  
(Mt 26.36-46; Lc 22.39-46)*

**32** Chentšana, canye luare Getsemaní ca uabáinoye tmojána. Chocna Jesús tojanéyana: “Muentše motbiama, chéntscuana atše choye chanjá, Bëngbe Bëtsáftaca jencuéntama ca.”

**33** Y tojéftsanëbiatše Pedro, Santiago y Juan. Choca cha yojóntsha puerte ngménaca jtsemnama y corente cochtsetšenaná. **34** Chéngbioye tojanéyana: “Atšbe ainana puerte ngménaca entsemna, mo jobanamcá. Muentše moquedanga y šmochtsefšna ca.”

**35** Chentšana, Jesús más natsanoye tojána, tojanoshéntsamentše y fshantsóntscoca tojanotsejbéna y Bëngbe Bëtsábioye tbojanimpadá, jopódianëse, chë tša japadésa ora ndoñe chaondóshjanguama. **36** Mëntšá yojtsichamo: “Atšbe Taitá, aca lempe jamama condobena; tojopodese, cochjama atše japadésama ndoñe chašondétsemnama. Pero ntšamo atše stsebošcá ndoñe chaondétsemna, sinó ntšamo aca cojtsebošcá ca.”

**37** Chentšana, chabe unga uatsjéndayëngbioye tojtanabo, y chéngna imnëtsomañe. Chca tojánanýena ora, Pédrëbioye tbojaniyana: “Simón, ¿cotsomañe? ¿Ni mo nyé canye hora jtsefšnama ndoñe tconjobená? **38** Smochtsefšna y Bëngbe Bëtsáftaca šmochtsencuéntaye, bacna soye jamama ndoñe chacmondócochënguama. Tšëngaftanga ndegombre šmontseboše espíritoca Bëngbe Bëtsá joyeunayana, pero cuerpiñe ndoñe añemo quešmátsbomna ca.”

**39** Jesús cachiñe tojesaná y Bëngbe Bëtsáftaca tbojanencuentá, cach palabrënga jayanëse. **40** Yojtabo orna, chë uatsjéndayëngá cachiñe imnëtsomañe;

chënga imojtsefshétana ocnaye causa, y ndoñe imontsobena ntšamo jojuana.

**41** Chentšana, tojtesaná y tojtanabo ora tojanéyana: “¿Cabá šmotsomaňe y šmotsochnaňe? Nýe nýetšá; hora tocjobuache, Bëngbe Bëtsá Entšá tbojanbemá bacna soye amëngbe cucuatšíñe mochanjáboshjona. **42** Motsbananga, cuajna. Minýënga, atše boshjuaná ya entsebeconá ca.”

*Uayayënga Jesús tmojánishache  
(Mt 26.47-56; Lc 22.47-53; Jn 18.2-11)*

**43** Jesús cabá yojtsóyebuambantscuana, Judas, canýe chë bnétsana uta uatsjendayënguentšá, tojánashjangó y cháftaca ba entšanga espadéjangaca y ngarotbéngaca prontánënga. Chënga imojamna chë bachnangbe améndayënga, ley abuátambayënga y judiëngbeñe bëtsëjemëngcá mändayëngbe ichmónënga. **44** Judas, chë boshjuana, tojanjuabó ntšamo jamana entšanga jinýanÿiyama ndémua Jesús bétsemnana. Chíyeca, yojáuyana: “Nda chajauámocho, cha echántsemna; šmochjishache y cuedádoca šmochjuánatse ca.” **45** Chcasna, Judas Jesúsbioye tojanobeconá y tbojaniyana: “¡Buatëmbayá ca!”

Y tbojanámocho. **46** Chora chë entšanga tmojánishache y tmojanánatse.

**47** Pero canýa chentše Jesúseftaca yojtsemná, chabe espadéja yojenosëngboténtšena, y chë bachnangbe más uámana améndayabe oservená canýe matscuaše tbojtsanéstjango.

**48** Y Jesús chë entšanga tojanatjá: “¿Ndáyeca šmojabo espadéjangaca y ngarotbéngaca atše jishachama, mo atše canýe bacá uamana entšá

cuaftsemncá ca? <sup>49</sup> Atše cada te tšëngtaftangbeñe sëndétsemna Bëngbe Bëtsabe bëts yebnoca abuátambaye, y ndocna te choca chešmátanishache. Pero tšëngtaftanga chca átseftaca šmontsama, cachcá ntšamo Bëngbe Bëtsabe uabemana palabrënguiñe endayancá chaotsemnama ca” —tojánayana.

<sup>50</sup> Chorna, nÿetsca uatsjéndayëngä tmojsanëuatjaná y tmojtsanacheta, y Jesús cachcá chë uayayëngtaftaca tmojesanonýá. <sup>51</sup> Canÿe bobontse Jesúsbioye ibojtséstona, nÿe canÿe uafjantse entšéjua uichëtjoná. Cha chë entšanga tmojánishache, <sup>52</sup> pero chëngbe cucuatšiñe chë entšéjua jesáboshjonëse, chë bobontsna enašá yojtsachá.

*Jesús tmojanánatse chë judiëngbe uámana amëndayëngbioye*

*(Mt 26.57-68; Lc 22.54-55, 63-71; Jn 18.12-14, 19-24)*

<sup>53</sup> Chentšana, Jesús tmojanánatse chë bachnangbe más uámana amëndayábioye; y chocna, nÿetsca chë bachnangbe amëndayëngä, bëtsëjemëngcá amëndayëngä y ley abuátambayëngä tmojánenefjna. <sup>54</sup> Pedro bënocana Jesús tbojanasto, chë bachnangbe más uámana amëndayabe yebnentša chashjóntscoñe; y chentše tojanoquedá. Chë Bëngbe Bëtsabe bëts yebnoca josticiëngtaftaca yojtsetbemana; iñe juachaca yojtsešbonena.

<sup>55</sup> Chë bachnangbe amëndayëngä y chë judiëngbe uámana mándayëngä imojsenguaye canÿa, nda ndayánaca Jesusbe contra cháuayana, as jobenayama cha chaóbana ca jayanama; pero

ndoñe montsaninÿana. **56** Er masque banga Jesusbe contra uayátsenaye soyënga imojsichamo, nÿetscanga ndoñe cachca soye montsanichamo.

**57** Báseftanga imojsaye y mëntsá Jesusbe contra, ndoñe ndegombre betsemncá tmojánayana: **58** “Bëngä cha fsënjoyeuná mëntsá: ‘Atše quem Bëngbe Bëtsabe bëts yebna, entšangbe pormana yebna, chantsepochóca; y unga tese inÿe Bëngbe Bëtsabe bëts yebna, entšángbeyeca ndëpormana yebna chanjëtsjebo ca.’ ”

**59** Pero masque chca imojsichamo, nÿetscanga ndoñe cachca soye montsanichamo.

**60** Chorna, chë bachnangbe más uámana amëndayá yojotsbaná, nÿetscangbe tsëntsaca yojotsaye, y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

**61** Pero cha nÿe iytëca yojtsemna y ndocá ibontsëjuana. Chë bachnangbe más uámana amëndayá cachiñe tbojtétantjá, mëntsá: —¿Aca chë Cristo icomna, Bëngbe Bëtsá chë nda fsëndadoranabe Uaquiñá ca?

**62** Y Jesús tbojanjuá: —Arseñor, atše cha sëndmëna; y tsëngaftanga šmochanjinÿe, atše, Bëngbe Bëtsá Entšá tbojanbemá, chë nÿets obenana bomnabe catšbioica chantsetbemana, y celoca jantsetëshiñe chántsaboye ca.

**63** Chora, chë bachnangbe más uámana amëndayá chabe uichëtjonëjuangá yojtsenántšajatanëca, puerte iboitsetna causa, y tojánayana: —¿Ndayama más entšanga šochjátëjaboto Jesusbe contra chamuayanama

ca? <sup>64</sup> Tšëngaftanga šmonjouena ntšamo chë entsá entsichamcá, y chca Bëngbe Bëtsabíama entsemna mo cha cuafjoyenguangcá, chë chabe Uaquiñá yomna ca cha tonjayana ora. ¿Ntšamo tšëngaftanga šmatjayana ca? —cha tojanéyana.

Y nÿetscanga tmojánayana, cha ndegombre bacna soye yojtsebomna y jóbanama ibojtsemna ca.

<sup>65</sup> Chorna báseftanga tmojanontsé Jesús buashëtjnayana; jubiá imojútsbotse, imojtsetaye y imojtsetjanaye: “¡Momalisiá nda tcmënajantsetá ca!” Y chë Bëngbe Bëtsabe bëts yebnoca josticiëngna imojsajuebjantsetaye.

*Pedro tojánayana Jesúsbioye ndoñe bonjanabuátma ca*

(Mt 26.69-75; Lc 22.56-62; Jn 18.15-18, 25-29)

<sup>66</sup> Pédrëna, tsmanoca yojtsemna chashjoca. Chora, canÿe shembásá, chë bachnangbe más uámana amëndayabe oservená yojáshjangó; <sup>67</sup> y Pédrëbioye tbojáninÿe ora, cha iñe juachaca yojtsanšbonena, yejuana ibojonyinÿiye y tbojaniyana: —Acnaca, Jesús Nazaretocáftaca conjánana ca.

<sup>68</sup> Pero Pedro tojánayana chábioye ndoñe bonjanabuátma ca; y mëntsá tojánayana: — Ndayama cojtsichámuama ndoñe quetsátstatshëmbo, ni quešnátésertana ca.

Y shjoye, amashjuanónscoñe yojábocna; y chora canÿe ngallo yojacánta. <sup>69</sup> Chë oservená cachiñe Pédrëbioye tbojáninÿe y tojanontsé chë ínÿenga jauyanana: —Muánaca Jesusbe uatsjendayënguentshá entsemna ca.

**70** Pero chana cachiñe tojánayana Jesúsbioye ndoñe bonjanabuátma ca. Chentšana, chë chentše imojtsemnënga Pedro tmojátaniyana: — Ndegombre aca chënguentšá contsemna; ácnaca Galileocá contsemna ca.

**71** Pero Pedro tojanontsé ichámuana: —¡Bëngbe Bëtsá chašotsecastigá ndoñe ndegombre soye stsichámëse ca! —y yojóntsa júrayana— ¡Atše chë entšá ndoñe quetsatabuatma, ndabiama tsëngaftanga šmontsatsëtsná ca!

**72** Y cachora chë ngallo uta soyama yojacánta, y Pedro yojenójuaboye ntšamo Jesús tbojaniyanama: “Ngallo cabá uta soye ndécánta ora, aca unga soye cochanjayana ndoñe šconduabuатma ca.” Y tojanontsé enóbošachiyana.

## 15

### *Jesús Pilátbiyoje tmojanánatse (Mt 27.1-2, 11-14; Lc 23.1-5; Jn 18.28-38)*

**1** Tojanbinýna ora, chë bachnangbe amëndayënga, chë judiëngbeñe bëtsëjemëngcá amëndayënga y ley abuátambayënga cánÿentše tmojánenefjna, nÿetsca chë luarentša más uámana mandayëngaftaca, jenóyeunayama ntšamo jamëse Jesús jóbama. Jesús tmojanëcuébatsëca y tmojanánatse, y Pilato, chë Judeoca mandadbe cucuatšiñe tmojánboshjona.

**2** Pilato Jesúsbioye tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

**3** Chë bachnangbe améndayëngá bëtscá soyëngá Jesusbe contra imojsichamo; **4** chíyeca Pilato cacheñé Jesúsbiye tbojantjá: —¿Ndocá šcochanjojuá ca? Minÿe; bëtscá soyëngá acbe contra montsichamo ca.

**5** Pero Jesús ndoñe más tbonjanjuá; chë causa, Pilato ndoñe yontsetátshëmbo ntšamo jajuaboyana.

*Jesús chaóbana ca tmojánayana  
(Mt 27.15-31; Lc 23.13-25; Jn 18.38–19.16)*

**6** Cada Bashco fiesta ora, Pilato yojanamana canÿe utamená jëtsboshjonana, ndánaca entshanga tmojuabuayaná. **7** Chë tempo yojamna canÿa Barrabás ca uabainá; cárceloye inautámena chabe enutëngtaftaca. Chëngna entshanga tmojtsanëbaye, mandadëngbe entshangaftaca imojentsjaná ora. **8** Chora, entshanga tmojánashjajna y tmojanontshé Pilátbiye jauyanana, ntšamo Bashco fiesta ora jamama yojanamancá chaomama. **9** Y Pilato tojanéjua: —¿Tsëngaftanga šmojtseboše tsëngaftangbe rey atše chjëtsboshjona ca?

**10** Chca tojánayana, er Pilato yojtsetátshëmbo, chë bachnangbe améndayëngna evidia causa Jesús chabe cucuatsiñé tmojánboshjonama.

**11** Pero chë bachnangbe améndayëngna entshanga tmojanañemó chamuenbouénanama, Pilato jauyanama chëngbiama Barrabás chabuatsboshjona ca. **12** Y Pilato tojanatjá: —¿Y ntšamo chjama chë “judiëngbe Rey ca” šmonduabobuatumáftaca ca?

**13** Y chëngna tmojanáyebuachena: —¡Motsecrucificá ca!

**14** Y Pilato entšanga tojanéyana: —¿Ndáyeca?  
¿Ntšamo cha tojobuachjanguá ca?

Pero chëngna más añémoca tmojtétanayebuachená: —¡Motsecrucificá ca!

**15** As Pilato, entšángafaftaca tšabá joquédama yojtsebóšeyecna, Barrabás tbojtanboshjona. Yojámëndaye soldadënga jabuache Jesús chamotsetšenama; y chentšana soldadëngbe cucuatšiñe tbojánboshjona, chamocrucificama.

**16** Chentšana, chë soldadënga Jesús tmojanánatse chë mandadbe bëts yebnentša chashjoye, y nÿetsca soldadënga tmojánachembo chamobéconama. **17** Shbuenda uafjatsenga uinÿna entšayá mo reycá tmojanichëtjo; canÿe coronésha tmojanapormá uchmašéfjangaca y tmojanabestšajó. **18** Y chentšana tmojanontsé jachuayana: “¡Bayté judiëngbe Rey cochtsemna cal!”

**19** Canÿe niñéfjaca Jesús bestšašiñe imojsétsjanjnaye, imojtsebuashëtjnaye, y chabe delante imojtsofshëntsaméntšenaye. **20** Y chca imnaftsáboyejuanentšana, chë shbuenda uafjatsenga entšayá tmojtsanabotsca y cachabe entšayá tmojanichëtjo, y pueblo chaboye tmojanánatse jacrucificama.

*Jesús tmojancrucificá  
(Mt 27.32-44; Lc 23.26-43; Jn 19.17-27)*

**21** Chora, canÿe entšá chëjana yojtsatashjajuana, Simón ca uabainá, Cirene pueblocá, Alejandro y Rufbe taitá; jajocana yojtsatachnëjuana; y chë soldadëngna imojuatária Jesusbe cruz jëftsocutsayama.

<sup>22</sup> Jesúś tmojanánatse Gólgota ca uabaina luaroye (hebreo biyañe endayana “Obanabe Bestšashe Luare ca”); <sup>23</sup> y tmojanabuiyé vínoye mírraca enájuabniye, pero Jesúś ndoñe yonjuáyëngacñe. <sup>24</sup> Y chentšana tmojancrucificá; y chabe entšayangamna, tsbanánoye tmojanétšena jinýama ndayá cada ona yochjëftsanácñama.

<sup>25</sup> Cachëse, base mošenana ora Jesúś tmojan-crucificá. <sup>26</sup> Y chabe bestšaše juatsboicna canýe uabemana soye tmojananjo. Chiñe yojétsayana ndáyeca cha tmojancrucificama, mëntsá: MUA CHÈ JUDIËNGBE REY ENDMËNA ca.

<sup>27</sup> Y cháftaca útata bacna soye ochjajnayátnaca tmojanacrucificá, canýa chabe catšbioica, y ínýana chabe uañicuayoica. <sup>28</sup> Chca cháftaca tmojanma, chaochnënguama ntšamo Bëngbe Bëtsabe uabemana palabrënguiñe chabiama iuayancá, mëntsá: “Y chábioye tmonjáninýe mo chë puerte bacna soye amënguentšá canýa cuافتsemncá ca.”

<sup>29</sup> Y chëjana imojsachnëjuana entšanga, Jesúś imojsóyenguaye, imojsobestšfshanenaye y imojsatsaye: “¡Aca chë Bëngbe Bëtsabe bëts yebna cochtsánenasatajchca y nÿe unga tese cochtanjebo, <sup>30</sup> cach aca mentsbocá y cruzocana matastjango ca!”

<sup>31</sup> Cachcá chë bachnangbe amëndayënga y chë ley abuátambayënga imojsáboyejuana, y chënga imojsenatsëtsnaye: “Cha ínýenga tojëftsatsebacá, pero cachá jéntsbocama ndoñe quenátobena. <sup>32</sup> ¡Chë Cristo, chë Israeloca Rey! ¡Cruzocana chauatast-jango, bënga jinýama y chábeñe chaftsošbuachema ca!”

Y cháftaca ibojtsecrucificanátnaca ibo-jtsóyenguaye.

*Jesús tojanóbana*

(Mt 27.45-56; Lc 23.44-49; Jn 19.28-30)

<sup>33</sup> Nÿetsto orscana y las treséntscoñe, nÿets quem luare yojtseibétata. <sup>34</sup> Chca orna, Jesús chabe biyañe tojanáyebuachena: “Eloi, Eloi, ¿lema sabac-tani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonýá ca?”)

<sup>35</sup> Chca tmojanuena ora, báseftanga chentše imojtsemnëngä imojsichamo: “Mouenëngä, chë Bëngbe Bëtsabe juabna oyebuambnayá Elías bontsechembuana ca.”

<sup>36</sup> As chora, canÿa tojanótjajo, untja vínoyeca canÿe esponjëshe tojanfchecuacuá, canÿe niñëfjiñe tojananguësëtjo y Jesúsbioye tojanbeconá chaofšema; y tojánayana: “Cachcá mochjonýaye, er Elias tayochjabo jabátëstjanguama ca.”

<sup>37</sup> Pero Jesusna, jabuache tojanoyó y tojanóbana. <sup>38</sup> Y chë Bëngbe Bëtsabe bëts yebnoca yojújonýana entšëjua tséntsaca yojtsenájataye, tsbanánocana fshantsoye. Chëjua bënëjua inauamna y chë tsatséntsaca inaujónýana. <sup>39</sup> Chë romano soldadëngbe amëndayá, Jesusbe ndirichiñe yojtsemna; y ntšamo cha tojanobancá tbojáninýe ora, tojánayana: “¡Ndegombre quem boyabása Bëngbe Bëtsabe Uaquiñá yomna ca!”

<sup>40</sup> Báselta shembásengnaca chentše imojtsemna, bënocana imojtserreparana; chënguentše imojtsemna María Magdalena; María, Santiago chë más basa y Josebe mamá; y Salomé.

<sup>41</sup> Chë shembásengna Jesús tmojanasto y

tmojanájabuache cha Galileoca yojamna ora; y inyé ba shembásengnaca chentše imojtsemna, chë cháftaca Jerusalenoye tmojánanga.

*Jesús tmojanatbontsá  
(Mt 27.57-61; Lc 23.50-56; Jn 19.38-42)*

<sup>42</sup> Chë yëfsana ochnayté yojtsémnayeca, cach te yojánamna saná japróntana chë yëfsana jasama. Ya yojtseibétatana ora, <sup>43</sup> Pilato yojtsemnoye tojána canye boyabása, José ca uabainá, Arimatea pueblocá; cha inamna canye chë luarentsa uámana mandayënguentzá. Cha Bëngbe Bëtsábeñe yojtsošbuáchiye y yojanobátmana chabe améndayana chaóshjanguama. Ndauatjcá Pilátbiye Jesusbe cuerpo tbojanotjañe. <sup>44</sup> Pilato yojenjnaná Jesús tsa betsco yojóbanama; as tojanmandá chë soldadëngbe améndayá chamuachembo, jatjayama Jesús ya bën obaná tayojetsemnama. <sup>45</sup> Chë soldadëngbe améndayana Pilátbiye ibojuuyana Jesús ya obaná yojtsemna ca; y as chora, Josébiye tbojanlesenciá Jesusbe cuerpo chabotsámbañama. <sup>46</sup> Chora, José canye uafjantse lino entšéjua tojanabuamé, Jesusbe cuerpo cruzocana tbojanéstjango, chë lino entšéjuaca tbojanandmaná, y canye cuevëshiñe ndëtsbeñe pormánëshiñe tbojanajó; chentšana canye ndëtsbé tojansjoná, y chë cuevëshoye amashjuanentše tojánachto. <sup>47</sup> María Magdalena y María, chë José y Santiagbe mamá, tbojáninye ndayentše Jesusbe cuerpo tbojanjájoma.

*Jesús tojtanayena  
(Mt 28.1-10; Lc 24.1-12; Jn 20.1-10)*

<sup>1</sup> Ochnayté tojanopasá ora, María Magdalena, María Santiagbe mamá, y Salomé, botamana uanguëtše békaye tmojanabuamé, chíyeca jama Jesusbe cuerpo janëtjuama; <sup>2</sup> y tmenguse, ché semana bojatšéntena, cabá cachëse, shinye yojábocna ora, ché cuevëshoye tmojána. <sup>3</sup> Imojsaye ora imojsayénatsëtsnaye: “¿Ché cuevëshoye amashjuantša ndëtšbé nda bochtsabuajána ca?”

<sup>4</sup> Pero imojontješiye ora, tmojáninye ché cuevëshoye amashjuantša bëts ndëtšbé, chentšana juanániñe. <sup>5</sup> As chëngä choye tmojánamashjna y choye tmojáninye canýe bobontse bën uafjantse entšéjua uichëtjoná, ché cuevëshentša catšbioica inétsotbemañe; y ché shembásenga imojouatjaná. <sup>6</sup> Pero ché bobontse tojanéyana: “Ndoñe matauatjëngana; tšëngaftanga šmondënguá Jesús Nazaretocá, ché tmonjancrucificá cha. Cha ya tontayena; muentše ndoñe quenátsmëna. Minýëngä cha enjëftsejajonentše. <sup>7</sup> Motsajna, y Pedro y ché inye uatsjéndayëngä šmochjáuyana: ‘Jesús tšëngaftangbe natsana Galileoye echanjá. Choca cha šmochanjinye, ntšamo cachá tcmojanëyancá ca.’”

<sup>8</sup> As ché shembásenga betsco ché cuevëshentšana tmojésanbocana, er puerte auatjanánëngä imojsemna y ngmëmnayëngä imojtsemna; y ché causa, ché soyama ndocná tmonjaniyana.

*Jesús, María Magdalénbiyoe tbojánebëbocna  
(Jn 20.11-18)*

**9** Jesús tojtanayenentšana, chë semana bojatšenté, Jesús natsana María Magdalénbiye tbojánebëbocna. Tempo Jesús chábentšana canýsëfta bacna bayëjënga tojtanëbuacana.  
**10** Cha Jesúsbioye ainá tbojáninÿentšana, tojána Jesúseftaca imojánajnëngä chama jaúnayama; chëngna ngménaca y šachénaca imojtsemna.  
**11** Pero chëngä tmojanjuabó nderado mo ndoñe ndegombre yontsemna ca, chë Jesús ainá yojtsemna ca, y María Magdalena chábiye tbojáninÿe ca tmojanuena ora.

*Uta ustonata Jesúsbioye tbojáninÿe*

(Lc 24.13-35)

**12** Chentšana, uta ustonátbiye, básefta yebnëngä yojamna luaroye ibojétsaye ora, Jesús tojánebëbuacna, mo inÿa cuافتsemncá.  
**13** Chora chata tbojésanshëcona chë ínÿenga chama jacúntama; pero chëngna cach ndoñe ndegombre ca tmojanjuabó.

*Jesús chë uatsjéndayënga tojanichamó, Bëngbe  
Bëtsabe soyëngama nÿetsquénache jábuayenama*  
(Mt 28.16-20; Lc 24.36-49; Jn 20.19-23)

**14** Cabana, Jesús chë bnëtsana canÿe uatsjéndayënga tojánebëbuacna, chëngä imojtsekiye ora; y tojanécácana chë cha ainá yojtsemnama ndoñe ndegombre yontsemna ca tmojanjuaboma y nÿets ainánaca chábeñe ndoñe montsanošbuachema, er cha ainá tmojáninÿëngä chama tmojanacuntá ora, chca ndoñe ndegombre yontsemna ca chë uatsjéndayënga tmojánayana.

**15** Chentšana Jesús tojanéyana: “Nÿets luarëngoye motsajna, y nÿetsca entšanga chë tšabe

noticiëngama šmochtsabuayiynaye. <sup>16</sup> Nda chiñe chaojtsošbuaché y tšëngافتanga chašmojuabayé, cha atsbocaná echántsemna; pero nda ndoñe tontsošbuaché, cha nÿets tempo castiganá echántsemna. <sup>17</sup> Chë átšbeñe ošbuáchiyëngä ndegombre soyëngä imoitsabuayiynama, entšanga mëntsá mochántsetatšëmbo: atše jótšëmbonëse, átšbeñe betsošbuachéyeca, entšángbentšana bacna bayëjëngbe juabna mochantábocna; tempo chëngä ndmabiyañe mochantsóyebuambnaye. <sup>18</sup> Masque nderado cucuatšiñe mëtšcuayëngä tmojishache o veneno tmojofšenga, ndocá quemochatspásä; y šoquëngbeñe cucuatšëngä chamojacjá ora, chëngä shnánëngä mochántsatsmëna ca” —Jesús tojanëyana.

*Jesús Bëngbe Bëtsábioye tojtaná  
(Lc 24.50-53)*

<sup>19</sup> Bëngbe Utabná Jesús jóyebuambayama tojanpochocá chentšana, celoye cha tmojtanatsbaná, y uámana luarentše, Bëngbe Bëtsabe catšbioica yojtótchema jtsemándayama. <sup>20</sup> Y chë uatsjéndayëngna tmojánbocana y Bëngbe Bëtsabe soyëngama nÿetsquénache entšanga tmojanabuayená. Cach Bëngbe Utabná chëngä yojanëjabuáchana, y yojánama entšanga chamotsetatšëmbuama chë buayenana soye ndegombre Bëngbe Bëtsabe soyëngä bétsemnama, chë uatsjéndayëngä bëts soyëngä jamama obenana chamotsebomnama cha jtsamëse.

## Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

### Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 11 Nov 2022 from source files  
dated 29 Jan 2022  
19104c0e-9046-5ff3-82fb-eb838c88dcf9